



الهيئة العامة لقصور الثقافة
إقليم القناة وسيناء الثقافى

◆ كوكب باللو
حسن الإمام

◆ حلم زفزوف
محمد عايش الشريف

◆ شهر وفواكه
هاجر حسين

◆ بسمة أمل
رياض الحلوانى

بِسْمِ اللَّهِ الرَّحْمَنِ الرَّحِيمِ

"ومن آياته أنك ترى الأرض خاشعة فإذا أنزلنا عليها الماء
اهتزت وربت إن الذي أحياها لمحي الموتى
إنه على كل شيء قدير"

صِرَاطُ اللَّهِ الْعَظِيمِ

سورة فصلت - آية رقم ٣٩

للأصدقاء الصغار نهدي هذه الابداعات

عندما عرضت فكرة أن نخصص كل مطبوعات الاقليم خلال هذا العام للابداع المخصص للطفل، على الأصدقاء في هيئة تحرير مطبوعاتنا ، وعندما تحمسوا معى للفكرة، كان تصورنا أن ما سنحصل عليه من إنتاج متميز يستحق النشر لن يزيد عن ثلاثة أو أربعة كتب على الأكثر لندرة المبدعين فى هذا المجال .

إلا أننا فوجئنا بعد أن أعلننا عن المشروع بكم هائل من الانتاج سواء فى المسرح أو القصة أو الشعر أو حتى الرواية والسيناريو ..

وبدأ الأصدقاء يقرأون ليختاروا لنا ما سننشره ، ووجدتهم يضعون أمامى ثمانية كتب مرة واحدة تضم إنتاجاً لاثنى عشر أديبا من الاقليم ، ويتحمس الصديق قاسم عليه قائلا.. «أنت الذى اخترت عليك أن تسعى لطبع كل هذا، فالانتاج متميز ويغضى كافة مجالات الابداع».

ووجدتنى بدورى أدفع بالأعمال كلها للمطبعة بعد أن استمتعت أنا أيضا بقراءتها، وهانحن صديقى القارئ الصغير نضعها بين يديك، وهى ليست بكثيرة عليك .

فأنت من سيرسم لنا مستقبلنا المشرق الذى نأمل فيه، أما من أمتعوننا بكتاباتهم وابداعهم فلهم كل الشكر لأنهم يؤكدون لنا أن مصر العظيمة بخير ما دام فيها كل هؤلاء الأبناء المحبون .

عبد الرحمن نور الدين

رئيس اقليم القناة وسيناء الثقافى

كوكب باللو

حسن محمد الإمام

كلمة لا بد منها

فى اليوم العالمى لمكافحة الإدمان كان أحد اللقاءات التلفزيونية مع أحد المسئولين وقد أذاع هذا المسئول تصريحاً أزعجنى واستفزنى ودفعنى لكتابة المسرحية إذ أنه صرح بأن تقرير منظمة التجارة الدولية أعلن أن تجارة المخدرات هى التجارة الثانية فى العالم بعد تجارة السلاح ونزلت على هذه الإحصائية كالصاعقة.. فنحن نعيش فى كوكب يستخدم معظم ثرواته فى إنتاج وتجارة السلاح والمخدرات فقررت أن أنجو من هذا الكوكب مع أصدقائى الأطفال إلى كوكب باللو.

الشخصيات

باللو : صديق الأطفال ومعلمهم
الحاكم : حاكم كوكب مسالم
مسئولة (١) : فتاة أعضاء بمجلس
مسئول (٢) : شاب الحكم بالكوكب المسالم
مسئول (٣) : شاب
مسئول الطفل : طفل وهو عضو مجلس الحكم
ضابط الرادار
القائد : قائد سفينة الفضاء
د. حسن : عالم نبات
د. على : عالم ذرة
منى : ابنة القائد
ضابط الفضاء
مجموعة أطفال

«يبدأ العرض أمام الستار.. باللو ومجموعة الأطفال يغنون ويلعبون»

باللو : غنينا ولعبنا.. ماتيجوا نريح أجسامنا وندي الفرصة لعقولنا تشتغل

طفل : وإن كانت عقولنا عايزة تستريح؟

طفل : يبقى الأحسن نديها أجازة

باللو : لأ ياولاد، ده العقل هو الفرق بيننا وبين باقى المخلوقات

طفل : يعنى العقل أحسن حاجة فى الإنسان؟

طفل : لا طبعا.. كل جزء فى الإنسان مهم.

باللو : طبعا ياولاد كل جزء له فائدة للإنسان.. بس المهم إن الإنسان يفضل إنسان

طفل : هو ممكن الإنسان يتحول لجماد أو حيوان؟

باللو : ممكن الإنسان بتصرفاته وأفعاله يبقى أقل من الحيوان

طفل : أنت توهنتنا ياعم باللو

باللو : مافيش توهة ولا حاجة.. مش المهم أجزاء جسم الإنسان

طفل : آمال إيه المهم؟

باللو : المهم صفاته وأفعاله.. قولوا لى ياولاد إيه أحسن صفة فى الإنسان؟

طفل : الذكاء من غيره ما ييقاش إنسان

طفل : القوة والشجاعة ما يقدرش يعيش من غيرها

طفل : أهم صفة الصدق والأمانة

طفل : العمل هو اللي بيخلي الإنسان يحس إنه عايش

طفل : أهم حاجة يكون الإنسان مثقف وبيقرا ويعرف

طفل : وأنت ياعم باللو رأيك إيه؟

باللو : كل اللي قلته ده جميل.

طفل : يعنى موافق من غير تعديل؟

باللو : فاضل حاجة بسيطة.. بس مهمة

الأطفال : إيه هى؟


باللو : إن الإنسان يحب أخوه الإنسان عشان الكل يعيش فى سلام

طفل : إحنا فعلا كلنا بنحب بعض ياعم باللو
باللو : لو كل واحد حب أخوه أو صديقه أو جاره دى حاجة عادية
طفل : أmaal إيه المطلوب تانى؟
باللو : مطلوب إن كل واحد فيكو يحب كل إنسان على الأرض حتى لو ما يعرفوش
طفل : وإيه فائدة إننا نحب ناس ما نعرفهمش؟
باللو : الحب هايجمع العالم كله وإذا انتشر الحب انتهت الحروب والناس كلها تعيش فى
سلام ..صح ياولاد؟
الأطفال : صح ياعم باللو
طفل : كده إحنا عقولنا اشتغلت وجه وقت المراجيح
طفل : ياللا بينا ياعم باللو نروح نتمرجح
باللو : روجوا انتوا ياولاد.. وأنا هاستناكم هنا
طفل : موافقين.. ياللا بينا
طفل : بس أوعى تنام وتحلم زى كل مرة.
باللو : لما بأحلم ما بأحلمش إلا بكم.. أنا ماليش فى حياتى إلا أنتم
طفل : سلام ياعم باللو
باللو : سلام ياولاد (يخرج الأطفال) سلام.. كلمة بنقولها كل يوم عشرات المرات وياريت
نفهم معناها وننفذها.. ما تبقاش مجرد كلمة للترحيب والوداع.. كلمة بنقولها
ونكررها كتير فى حياتنا من غير ما نفهم لها معنى وقيمة.. ياسلام لو الناس
تفهم معنى السلام (يتتابع) لما أريح شوية عقبال ما ييجوا الأولاد (ينام ويغطى
جسمه بالكامل على أحد جانبي المسرح ويفتح الستار على قاعة اجتماعات غير
تقليدية ونسمع جهاز صوت يعلن عن بدء اجتماع هام بعد خمس ثواني وبمجرد
انتهاء الإعلان يدخل مجموعة المسئولين والحاكم ويجلسون على مقاعد
الاجتماع)
الحاكم : فى الحقيقة أنا مندهش.. إزاي ده حصل؟
م . ١ : أنا مش مندهشة بس.. أنا منزعجة
الحاكم : إنت اللي بتقولى الكلام ده يادكتورة؟

- م. ١: أيوه أنا ..لأنى مش لاقيه لغاية دلوقتى المبرر العلمى للى حصل
- م.الطفل : إزاي يادكتورة؟ كل ظاهرة لابد يكون ليها مبرر علمي
- م. ١: إلا الظاهرة الخطيرة اللى بنناقشها دى
- م. ٢ : ليه يادكتورة؟
- م. ١: باسم حصل علي كل أنواع الرعاية.. الصحية والاجتماعية والتعليمية والذهنية والرياضية.. كل شىء.. زي كل أبناء الكوكب.
- م. ٣: فعلا .
- م. ١ : ومع ذلك كذب.. تصوروا ده أول حادث كذب من ٢٠٠ سنة.
- الحاكم : تفتكروا عندنا خلل فى نظام التربية؟
- م.الطفل: ما أعتقدش لأن ظاهرة كذب باسم تعتبر ظاهرة فردية
- م. ٢ : لكن إيه اللى خلاه يقول لوالده إنه راح تمرين الهوكى وهو ماراحش؟
- م.الطفل : ممكن يكون ما يبجش الهوكي
- م. ٣ : مش ممكن .. ده تم ضمه لفريق الهوكى بعد اختبارات ذهنية ونفسية وعمل دراسة تشريحية لعضلات جسمه .. يعني هو مؤهل إنه يكون لاعب هوكى.
- الحاكم : فعلا .. والدليل علي كده المستوي المرتفع اللى ظهر بيه في مبارتنا مع كوكب ساديوك
- م.الرادار : (يدخل) أسف لقطع الاجتماع
- الحاكم : فيه إيه؟
- م.الرادار : فيه طبق طائر بيقرب من الكوكب بسرعة كبيرة جدا
- م. ١ : اتصلت بيه؟
- م.الرادار : أيوه طبعا.. بعث له إشارات استفسار
- م. ٢: وجالك رد؟
- م.الرادار : لأ.
- الحاكم : روح أتأكد جاي منين الطبق ده ورد على بسرعة (يخرج)
- م.الطفل : ممكن يكون ركاب الطبق فى مشكلة ومش قادرين بيعتوا إشارات
- م. ٣: أيوه فعلا .. ممكن يكون جهاز الإشارات عطلان

- م. ١ : لازم نتحرك بسرعة لإنقاذهم
- الحاكم : لما نعرف الأول الموضوع
- م. ٢ : لا يسيادة الحاكم .. الأول ننقذهم ويعددين نعرف الموضوع
- م. الطفل : أنا متيها لى أن دى حركة من حركات حاكم كوكب كوريون
- م. ٣ : معقولة؟
- م. الطفل : مش فاكيرين السنة اللي فاتت لما فضل يلف حوالين الكوكب سبع دقائق كاملة؟
- م. ١ : أيوة.. وبعت إشارات استغاثة
- م. ٢ : وطلعنا سفن الإنقاذ
- م. الطفل : وفى الآخر يضحك ويقول.. وضحكت عليكم
- م. ٣ : سواء كان حاكم كوريون أو غيره إحنا لازم نعمل احتياطنا
- م. الرادار : (يدخل) اتضح إن الطبق الطائر بيقود مجموعة من سفن الفضاء
- م. ١ : وعرفت جايين منين؟
- م. الرادار : لما دخلوا مجال رادار الكوكب علي بعد ٥٠ ألف ميل سجلت حديثهم مع بعض .. واتضح أنهم..
- الحاكم : منين ؟
- م. الرادار : من كوكب الأرض
- الجميع : كوكب الأرض؟
- الحاكم : كان واضح إن كوكب الأرض فى السنين الأخيرة بيتقدم بسرعة كبيرة
- م. ٣ : وقدرنا يوصلولنا..
- م. ١ : بس ياترى ناويين على إيه؟
- الحاكم : يعنى انتوا مش عارفين سكان كوكب الأرض؟
- م. ٢ : عارفينهم ودارسينهم
- م. ٣ : التجارة الأولى عندهم هي تجارة السلاح
- م. ١ : عندهم كل أنواع التلوث
- م. ٢ : حتى طبقة الأوزون اللي خلقها لهم ربنا عشان تحميهم من الإشعاعات الكونية
- ماحافظوش عليها .

- م. الطفل : دول يحاربوا بعض لأتفه الأسباب
- م. ٢ : ياترى هاي عملوا معانا إيه؟
- الحاكم : هوده اللي أنا بأفكر فيه.
- م. الرادار : أنا سمعتهم فى الرادار بيتكلموا عن مشكلة بتواجههم دلوقتى
- الجميع : إيه هى؟
- م. الرادار : إن الوقود والأغذية على وشك الإنتهاء
- الحاكم : ده جميل
- م. ١ : تقصد إيه ياسيادة الحاكم؟
- الحاكم : قصدى واضح
- م. طفل : يعنى نسيبهم يموتوا من الجوع؟
- م. ٢ : دى مش أخلاقنا
- الحاكم : أنا ما قلتش كده
- م. ٣ : أمال قصدك إيه؟
- الحاكم : قصدى إننا ممكن نضغط عليهم عشان يرجعوا الأرض وما يجوش كوكبنا تانى
- م. ١ : وتفتكر دى طريقة مقنعة؟
- م. ٢ : ممكن يتظاهروا بالموافقة وبعد كده يرجعوا يحاربونا
- الحاكم : دى طريقة لكسب الوقت
- م. طفل : أنا مش مقتنع
- الحاكم : عندك خطة تانية؟
- م. طفل : الحوار .. لازم نتكلم معاهم ونقنعهم
- م. الرادار : الوقت بيمر وسفن الفضاء على وشك الهبوط على الكوكب
- م. ٣ : أول حاجة نعملها إننا نخبي كل الأسرار والمخترعات والأغذية والوقود.
- م. ١ : وبعد كده؟
- م. ٢ : نستخبي إحنا كمان
- م. ١ : أنا موافقة علي الاقتراح ده.
- م. ٢ : وأنا موافق.. بس عندي إضافة



م. ٣ : إيه هي؟

م. ٢ : هنخبي كل الحاجات دي في خزنه استخدم فيها آخر مخترعاتي.. إشعاع الأخلاق

مسئول الطفل : يعنى إيه؟

م. ٢ : يعنى الخزنة يخرج منها أشعة تكشف أخلاق اللي واقف قدامها.. وما تفتحش إلا إذا وقف قدامها شخص بالمواصفات اللي إحنا نحددها.

الحاكم : يكون مسالم

م. ١ : أمين

م. الطفل : بيحب الخير

م. ٢ : شجاع

م. الرادار : عادل

م. ١ : ذكى

م. ٣ : مثقف

م. ٢ : كل ده ممكن بس المهم تساعدوني عشان ننجز المهمة بسرعة.

الحاكم : ياللا كلنا نجهز الخزنة ونجمع فيها كل أسرارنا ومخترعاتنا وكل الأغذية والوقود. «استعراض بناء الخزنة ينتهى باختفاء أفراد الكوكب ودخول قائد السفينة

ودكتور على ودكتور حسن»

القائد : إيه الحكاية؟ ما فيش أي مخلوق علي الكوكب

د. على : رغم أن الأجهزة رصدت أشكال للحياة علي الكوكب.

د. حسن : وأرض الكوكب مستصلحة وده دليل إن فيه حياة.

القائد : أنا في كل الأحوال هنفذ مهمتى وأحتل الكوكب

د. على : وأنا يهمنى إني وجدت المكان المناسب للتجارب الذرية والنووية.

د. حسن : لا يا جماعة الموضوع مش احتلال وتجارب نووية

القائد : أمال الموضوع إيه يادكتور حسن؟

د. على : يمكن جايين المسافة دي كلها عشان نجرب زراعة الفجل في الفضاء

د. حسن : دكتور على.. أنا ما اسمحلكش بالسخرية

د. علي : أنا ما بأسخرش ولا حاجة.. أنت عالم نبات وده شغلك ومن حقلك تدافع عنه.
د. حسن : لأ.. ده مش مجرد شغل.. دى رسالة يادكتور ..أيوة البحث لخدمة البشرية
وتوفير موارد جديدة للغذاء رسالة.

القائد : يا جماعة مافيش داعى للاختلاف .. الكوكب كبير وكل واحد هيلاقى مكان يعمل
فيه أبحاثه.. المهم أولا نخط ايدينا علي ثروات الكوكب.

د. حسن : ما تنساش ياكابتن إن المواد الغذائية اللي معانا قربت تخلص

د. علي : وكمية الوقود ماتكفيش نرجع الأرض

القائد : فاكدر مش ناسى.. لكن الغريبة إنى ما شفتش أى حاجة على الكوكب من ساعة
مانزلنا

د. علي : يمكن كان فيه حياة وانقرضت

د. حسن : بص ياكابتن.. دي كأنها خزنة

القائد : أيوة.. فعلا

د. علي : أكيد هنلاقي فيها اللي إحنا عابزينه

القائد : ده احتمال كبير

د. حسن : يبقى لازم نفتحها

القائد : دي مهمة الدكتور على

د. علي : دى حاجة سهلة جدا قدام الأجهزة العلمية اللي معاها «يحاول فتح الخزنة لكنه

يفشل « غريبة.. الخزنة بتطلع إشعاعات مش معروفة

القائد : ده دليل إن الكوكب فيه حياة

د. علي : ممكن يكون أهل الكوكب عندهم تقدم علمى أكثر مننا

د. حسن : ومعني كده إننا متراقبين

«تدخل طفلة ومعها رجل فضاء»

منى : بابا

القائد : منى ..إيه اللي جابك هنا؟

الضابط : إحنا لقينا البنت دى يافندم نازلة من سفينة القيادة وإحنا بنجهز المعسكر.

القائد :شكرا .. روح أنت .. إنت هنا.. جيتى هنا إزاي؟

منى : لما كنا بنوصلك أنا وماما .. أتسحبت وركبت السفينة

القائد : وليه ؟

منى : كان نفسى أشوف الحاجات اللى بتحكيلى عنها فى الفضاء

القائد : ده كلام .. أنت مش عارفة المصيبة اللى عملتها ممكن تتسبب فى إيه؟

منى : مصيبة إيه بابا .. كل أصحابي بيخرجوا مع أبياتهم إشمعنى أنا؟

القائد : وبعدين .. أعمل إيه دلوقتى؟

د. على : دلوقتى ياكابتن المفروض نفكر فى المشكلة اللى إحنا فيها ونسيب المشاكل

الخاصة

القائد : ده مش مشكلة خاصة يادكتور .. دى بقت مشكلتنا كلها

د. حسن : على كل حال وجود منى أصبح أمر واقع سواء وافقنا أو رفضنا

منى : بابا .. أنا عايزة أتفسح فى الكوكب ده ..

القائد : تتفسحى فين؟ إنت ما تتحركيش من هنا خالص ولغاية ما نرجع أى أوامر

تتفذيها زيك زى أى فرد فى المجموعة.

منى : «تؤدى التحية العسكرية» تمام يافندم

القائد : ودلوقتى نبدأ العمل .. أنا هاصدر أوامر بإطلاق إشعاعات كاشفة وغازات

مهيجة للأعصاب، ومسيلة للدموع عشان لو أى حد مستخبي يظهر

د. على : فكرة معقولة

د. حسن : لأ طبعا دى فكرة مجنونة .. المفروض نبدأ بتوجيه نداءات نطلب فيها من سكان

الكوكب التعاون معنا

د. على : نداءات إيه يا أبو على .. أنت فاكركنا فى سوق الخضار؟

د. حسن : قلت لك ميت مرة بطل أسلوب السخرية ده فى التعامل معايا

القائد : يا جماعة بطلوا خناق .. عايزين نتفق ونبدأ التحرك

د. على : أنا موافق على اقتراحك ياكابتن

د. حسن : أنا مش موافق لأن الإشعاعات والغازات هاتسبب تلوث هواء الكوكب

منى : بابا .. ممكن أقول رأيي؟

القائد : إنت تسكتى خالص

د. حسن : تسكت ليه ياكابتن؟ أنت لسه قايل إنها زى فرد فى المجموعة.. يبقى من حقها تقول رأيها.

القائد : بس دى

د. حسن : إنسانة وليها عقل وبتفكر

القائد : إتفضللى قولى رأيك

منى : إحنا نغنى مع بعض أغنية لسكان الكوكب نقول لهم إن إحنا أصحاب وجايين عشان نتعاون مع بعض

د. حسن : أنا موافق على الاقتراح ده.

د. على : موافق؟ موافق على إيه؟ إيه يادكتور .. راجل زيك عالم نبات محترم يغنى؟ وأنا أكبر علماء الطاقة الذرية على كوكب الأرض.. أغنى؟

د. حسن : وهو الغنا هيققل من قيمتنا؟

د. على : اللى فاضل تقول نرقص كمان

منى : أيوه ياعمو.. ممكن نغنى ونرقص

د. على : لا مغلش يا جماعة.. أنا مش عامل حسابى.. مش جايب معايا عدة الشغل

القائد : متهاى لى يادكتور حسن تخصصك بعيد عن موضوع الغنا ده.

د. حسن : مين قال كده؟ أنا آخر دراسة عملتها كان موضوعها تأثير الموسيقى فى نمو النباتات .. وثبت إن النباتات بتتأثر بالموسيقى وبيزيد نموها

د. على : يا جماعة.. إحنا سيبنا موضوعنا الأساسى وبنناقش الموسيقى والغنا والرقص

د. حسن : إحنا فى صلب الموضوع

د. على : يادكتور حسن.. إحنا مش فى النادى.. إحنا فى مهمة علمية.

د. حسن : وعشان كده لازم نستخدم كل نتائج التجارب العلمية

القائد : يا جماعة كفاية خناق.. إنتوا تعبتونى

منى : أنا عندى أغنية حلوة قوى

د. حسن : ياللا يامننى نغنيها سوا

«مع الأغنية يدخل أفراد الكوكب ويشاركون فى الغنا والرقص»

القائد : إنتوا جيتوا منين

- الحاكم : إحنا طول الوقت معاكوا
- م. ١ : وسمعنا كل كلمة قلتوها
- م. ٢ : وعارفين المشاكل اللي بتواجهكوا
- د. على : يعني جايين تساوومونا
- م. الطفل : لأ.. إحنا ما نعرفش المساومة
- القائد : قصده نتفاوض
- م. ٣ : ومافيش موضوع ممكن نتفاوض فيه
- د. على : أه عرفت .. سبب ظهوركم الخوف من الأشعة والغازات اللي فكر فيها الكابتن.
- م. رادار : لا .. الكوكب مغلف بطبقة بتمتص أى إشعاعات أو غازات ضارة.
- د. حسن : آمال ظهرت لميه؟
- الحاكم : لإننا إكتشفنا إن فكرتنا عن أهل الأرض مش صحيحة
- القائد : إزاي؟
- م. ١ : لقينا الأرض عليها ناس شغلتهم الحرب والدمار
- م. الطفل : وناس تانية زى منى والدكتور حسن بيحبوا الخير
- م. ٢ : ناس زينا عايزين الخضرة والحب وينتشروا
- د. على : يعنى أنا والكابتن الأشرار؟
- م. ٣ : أى إنسان يقضى عمره فى اختراع أسلحة الدمار يبقى شرير
- م. ١ : التجارب الذرية والنووية ممكن تبقى فى صالح الإنسان
- د. على : إحنا فعلا بنعمل على الأرض مفاعلات ذرية لتوليد الكهرباء
- م. ٢ : لكن كل ما تعملوا حاجة هدفها الخير بتعملوا ألف سلاح للدمار والتخريب.
- د. على : عايزين تفهموني إن إنتوا ما بتصنعوش أسلحة؟
- الحاكم : أجدادنا من مئات السنين إتخلصوا من كل الأسلحة
- م. الرادار : وحولوها لأشياء نافعة
- م. الطفل : الحوار هو الطريقة الحضارية لحل أى خلاف فى الرأى
- القائد : ده جميل
- د. على : إيه اللي جميل ياكابتن؟

القائد : الجميل إن الكوكب مافيش عليه أى سلاح
د. حسن : يعنى إيه؟
القائد : ده هيسهل مهمتى فى احتلال الكوكب
منى : لا يابابا دول ناس مسالمين.. لازم يبقوا أصدقاءنا مش أعدائنا
القائد : إسكتى أنت خالص
م. الطفل : واضح إن الأرض فيها الخير والشر
منى : والخير عندنا أكثر بكثير من الشر
الحاكم : لكن الكابتن هو دلوقتى صاحب القرار
منى : بابا مش شرير.. مش كده يابابا؟
القائد : أنا بانفذ تعليمات
د. حسن : يعنى لو كنت صاحب القرار يبقى ليك رأى ثانى
د. على : متهيألى ياكابتن إننا بنضيع وقت فى المناقشة دى على الفاضى
د. حسن : ده مش تضيع وقت يادكتور .. إحنا بناخد أخطر قرار فى حياتنا
د. على : القرار أتأخذ من ساعة ما أتحركنا من الأرض ياأبو على
م. ١ : واضح إن أهدافك مش فى صالح الخير
د. على : أهدافى لصالح العلم
م. ٢ : العلم لازم يكون فى خدمة البشرية مش سبب دمارها
منى :بابا لازم تاخذ قرارك
د. على : أيوه ياكابتن.. لازم تاخذ قرارك وبسرعة
القائد : قررنا نحن قائد القوات الفضائية احتلال الكوكب والقبض على حكامه ووضع
أيدينا على ثروات الكوكب.
د. حسن : أنا كنت عارف القرار من البداية
الضابط : (يدخل) ياحضرة القائد .. ياحضرة القائد
القائد : إيه فيه إيه؟
الضابط : فيه سفينة فضاء شكلها غريب بتهاجمنا
القائد : يعنى إيه شكلها غريب

الضابط : سفن علي شكل حيوانات وطيور وبيطلع من عندها إشعاع
د. على : إيه نوع الإشعاع اللي بيطلع؟
الضابط : مش عارف.. لكن كل اللي أصابهم الإشعاع.. إتجمدوا .. إتحولوا لتمثيل،
أفراد الكوكب : هيه .. باللوجة .. باللوجة...
القائد : باللومين ؟ إحنا وقعنا فى كمين.. حكام الكوكب ضحكوا علينا لما قالوا إن ما عندهم سلاح.
الحاكم : إحنا فعلا ما عندناش سلاح
الطفل : واحنا ما بنكذبش
م. ٢ : باللو ده صديقنا
م. ٣ : حاكم كوكب باللو
م. ١ : ودايما يوصل فى الوقت المناسب
«يدخل باللومعه مجموعة الأطفال ويصوبون أسلحتهم الاشعاعية نحو الجميع فيتحولون لتمثيل»
باللو : أنا وصلت .. بسرعة مجموعة الحركة تحرك أصدقائنا.
الحاكم : أهلا بيك يا عم باللو
الطفل : أنقذتنا فى الوقت المناسب
باللو : وعرفتوا جايين منين؟
م. ١ : من كوكب الأرض
طفل ١ : أنت حكيت لنا عن الكوكب ده يا عم باللو
طفل ٢ : وقلت لنا إنه كوكب جميل وخيراته كتير
طفل ٣ : لكن سكانه مش عارفين يستغلوا الخيرات دى
طفل ٤ : ودايما بيحاربوا بعض
باللو : رغم أنهم دايما يعلنوا أنهم بيحبوا السلام
م. ٢ : لكن فيهم اللي فعلا بيحبوا السلام
باللو : زى مين؟
م. ٣ : البنت دى

م الطفل : والدكتور حسن

باللو : حركوهم ياولاد

«يسلط الأطفال إشعاع على منى وحسن فيتحركا»

منى : أكيد أنت عم باللو

باللو : الله ..دنا مشهور بقي...وعرفتيني منين يا .. إنتى اسمك إيه؟

منى : اسمى منى وسمعتهم بيقولوا اسمك وهم فرحانين قبل ما تحولنا لتماثيل

باللو : وإنت يادكتور حسن إيه رأيك في عمايل أهل الأرض؟

د. حسن : أهل الأرض فيهم علماء بيبحثوا فى صالح الخير .. وعلماء بيخترعوا أسلحة الدمار .

باللو : وانت بتبحث فى إيه يادكتور؟

د. حسن : أنا عالم نبات.. نفسى الأرض تبقى كلها خضرا وما يبقاش فيها جعان

الحاكم : لولا اللى زيك كان كوكب الأرض انتهى من زمان

د. حسن : ممكن أسألك ياكابتن باللو؟

باللو : اتفضل

د. حسن : أنا سمعت الضابط بيقول إن سفن الفضاء بتاعتكم على شكل حيوانات وطيور

بالو : فعلا

د. حسن : ياترى عاملينها بالشكل ده ليه؟

باللو: عشان فى أوقات السلام الطويلة جدا يبقى ليها استخدام تانى

منى : الله..دى فكرة جميلة

باللو : وبيركب فيها أجهزة تخلى الحيوانات والطيور تتحرك بالأطفال

حسن : ده استخدام ذكى جدا

منى : ممكن ياعم باللو تخلوا بابا يتحرك؟

باللو : عشان خاطرك يامننى ممكن(للأطفال) حركوه

«يسلط الأطفال الإشعاع على القائد فيتحرك»

القائد : إيه ؟ فيه إيه؟

م . ١ : مافيش حاجة ياكابتن

م. ٢: كل الحكاية إن عم باللو دلوقتى هو صاحب القرار

م. ٣: يعنى مافيش احتلال كوكب

الحاكم: ولا استيلاء على ثرواتنا

الطفل: ولا ها يتقبض علينا ياكابتن

القائد: ياجماعة أنا كنت مضطر

الحاكم: مافيش حد مضطر يكون شرير

منى: أرجوكم سامحوا بابا

باللو: بشرط

القائد: إيه هو؟

باللو: أنك بعد كده تكون رسول سلام من أهل الأرض لكل الكواكب

القائد: يعنى إيه؟

د. حسن: يعنى بدل ما تروح الكواكب عشان تحتلها تحاول تعمل صداقات مع سكانها.

القائد: لكن ياجماعة أنا بأنفذ تعليمات رؤسائى

منى: لازم تناقش رؤسائك يابابا

القائد: أيوه يامننى.. ولازم أقنعهم

باللو: ياولاد حركوا اللى فاضل

د. حسن: دكتور على؟ ده ما أفنكرش إنه هايتغير

«الأطفال يسلطون إشعاعا يحرك على»

على: إيه اللى حصل؟ أنا لسه عايش؟

طفل ١: إحنا ما بنقتلش حد

على: بس سلاحكم ده أقوى من القتل

باللو: لا يا دكتور على.. إحنا بنحمى الناس من الشخص الشرير

طفل ٢: وبنحمى الشرير من نفسه.

على: تعرف ياعم باللو إحنا ممكن نتعاون مع بعض ونحتل الكون كله بالسلاح ده.

د. حسن: مش بأقول لكم. دكتور على عمره ما هايتغير

الحاكم: بس إذا ما أتغيرش ممكن عم باللو يخليه يقضى بقية عمرة متجمد

القائد : إيه رأيك يادكتور على
على : لا ..أنا اتغيرت .. أنا بأحب السلام.. بأحبه قوى قوى.. دنا حتي هاغير اسمى ..
هاسمى نفسى عبد السلام
د. حسن : قد أفلح إن صدق
القائد : ودلوقت يا جماعة ممكن تمدونا بالوقود والأغذية عشان نرجع الأرض؟
الحاكم : دى حاجة بسيطة ياكابتن كل اللي أنتوا محتاجينه هاتلاقوه فى الخزنة دى.
د. على : إحنا عارفين .. لكن نفتحها إزاي؟
م . ١ : دى حاجة بسيطة جدا
م . ٢ : فتحها من أسهل ما يمكن
د. على : إزاي أنا حاولت أفتحها ما عرفتتش
د. حسن : وعمال داوشنى وتقول لي أنا أكبر عالم ذرة
م . ٣ : الموضوع مش محتاج عالم ذرة
م . ١ : ولا محتاج علما من أصله
الطفل : ممكن منى تفتح الخزنة
القائد : إيه؟ منى؟
الحاكم : أيوه ياكابتن لو وقفت منى قدام الخزنة هاتتفتح علي طول
القائد : وإشمعنى منى؟
الحاكم : لأنها أنقى إنسانة فيكم
الطفل : بتتوفر فيها كل شروط الإنسان اللي تتفتح قدامه الخزنة
منى : صحيح؟
الحاكم : جربى
«تصعد منى وتقف أمام الخزنة فتتفتح»
على : معقولة؟ دى اتفتحت
د. حسن : شايف ، طفلة عملت اللي ما عرفتتش تعمله
الحاكم : لأنها بتتوفر فيها شروط فتح الخزنة
القائد : وإيه هي الشروط دى؟

الحاكم : المسألة والأمانة

م . ١ : حب الخير والشجاعة

م . ٢ : العدل

م . ٣ : الذكاء والثقافة

الطفل : يعنى إنسانة

د. حسن : عشان كده ما أتفتحتش للدكتور علي

د. علي : قصدك إيه يادكتور حسن، أنا مش إنسان؟

الحاكم : دلوقت يا جماعة خدوا اللي يكفيكم من الوقود والأغذية

باللو : نتمنى نشوفكم في ظروف أحسن من كده

د. علي : وأرجو ياعم باللو إنك تشاور عقلك فى المشروع اللي عرضته عليك

الأطفال : تانى.. (يشير إليهم باللو فيجمدونه بالأشعة)

د. حسن : مش قلت لكم مش هايتغير

باللو : عشان كده هايقضى بقية عمره متجمد

د. حسن : طب ياللا نشيله علي السفينة

القائد : لا يادكتور حسن خليه تذكّر لأهل الكوكب إحنا مش عايزينه

باللو : وإنت ياسيادة الحاكم لازم تسمع نصيحتي اللي قلتهالك أكثر من مرة.

الحاكم : إيه هي؟

باللو : إنك لابد تحتفظ بسلاح تدافع بيه عن الكوكب وقت اللزوم.

طفل ١ : فعلا لازم يكون عندك سلاح

طفل ٢ : لأن السلام لابد من حمايته

طفل ٣ : واحنا هنساعدك

طفل ٤ : أى سلاح تطلبه ممكن نوفروهوك

الحاكم : كفاية يكون عندنا أشعة التجمد اللي معاكوا

باللو : خلاص.. دى بسيطة.. أدوله ياولاد أسلحتكم .. ودى هدية من كوكب باللو

«يغني الجميع أغنية تحتفل بباللو وتودع أهل الأرض ويخرج باللو والأطفال فى

منتصف الأغنية ويعود المشهد إلى الحديقة.. باللو نائما يردد مقاطع من الأغنية

ويدخل الأطفال»

طفل ١ : إصحي ياعم باللو

طفل ٢ : أنت بقالك ساعتين نايم

طفل ٣ : ده بيغنى

طفل ٤ : ياعم باللو.. إصحي ياعم باللو

باللو : «وهو نصف مستيقظ» السلام لازم سلاح يحرسه

طفل ١ : سلاح إيه ياعم باللو؟

باللو : إحنا فين يا ولاد؟

طفل ٢ : إحنا فى الجنينة ياعم باللو

طفل ٣ : وحضرتك كنت نايم

طفل ٤ : ساعتين بحالهم

باللو : أما كان حنة حلم

طفل ١ : حلمت بإيه ياعم باللو

باللو : حلم جميل

طفل ٢ : إحكىهولنا

باللو : أحكىهولكم بس عايز هدوء..

طفل ٣ : كلنا سكاتين ياعم باللو

«أغنية الختام علي لسان باللو والأطفال»

1

حلم زفروق

محمد عايش الشريف

شخصيات المسرحية

زقزوق

الزوجة

حرفوش

مارد ١

مارد ٢

نجمه

الانسان الالى

الحارس

مجموعة من سكان المدينة

المشهد الأول

المنظر : (منزل زقزوق الذى يتكون من اثاث متواضع .. الكنبه .. زير)

(يدل على البخل لا الفقر)

زقزوق : (دا خلا وهو يحدث زوجته خضره) .. أه يا خضره لو املك خاتم سليمان أو

مصباح علاء الدين .. كنت اجيب كل الجوهر اللى فى الارض .. ومش الارض

ويس .. السما كمان .. وأبقى أغنى واحد فى العالم ..

الزوجه : مانت عندك كثير يا زقزوق .. مش مكفيك ..

زقزوق : أنا عاوز اكتر واكتر .. عايز ذهب وياقوت ومرجان .. يا سلام يا خاتم سليمان لو

الاقبك أو اقدر حتى اشتريك ..

الزوجه : يا زقزوق حرام عليك .. حرام عليك اللى أنت بتعمله ده .. الطمع اللى انت فيه

ملوش حدود .. دانت مداين الناس ومعذبهم ..

زقزوق : معذبهم ليه ؟ علشان بأطالب بحقى أبقى طماع وحقود

الزوجه : ايوه بعن الرحمه حلوه

زقزوق : الرحمه فى الفلوس ما تنفعش يا خضره

الزوجه : عندك كثير بس بخيل

زقزوق : أنا ما بحبش حاجه فى الدنيا قد الجواهر والفلوس

الزوجه : علشان كده عمال تكس فيها وتراعيها .. وسايينا من غير لقمة ولا هدمه .. تريح

البال وتستتر العيال .

زقزوق : وكمان ما بحبش العيال علشان بيصرفوا كثير ..

الزوجه : والربا اللى بتسلف بيه الناس مش حرام ؟

زقزوق : دا مسموش ربا يا خضره .. دى فوايد .. زى الفيتامينات .

الزوجه : طب وعزوز اللى حجزت على داره علشان أتأخر يوم عن الدفع
زقزوق : ويتأخر ليه .. هو أنا كنت اتأخرت لما سلفته الخمسمية جنيه
الزوجه : وقاسم اللى طردته من بيته هو وعياله واخذت البيت للدين اللى عليه
زقزوق : مرضيش يدفع اللى عليه
الزوجه : كان مريض وكان معذور ..
زقزوق : بطلى كلام كثير .. لحسن احرمك من الغدا ..
(دق على الباب)
زقزوق : اسمعى .. لو كان ضيف انا مش موجود .. أه .. أنا لا عندي شاي ولا حتى ميه
الزوجه : دا حرفوش .. جاي علشان يسدد دينه ..
زقزوق : طب دخليه من غير لا شاي ولا قهوة . (يدخل حرفوش وهو رجل رث الثياب) هات
الدين يا حرفوش على طول .. وروح من غير ما تقول .. علشان تنام خفيف ..
ياله يا خفيف .. فين الدين ؟
حرفوش : أصل .. أصل .. فى الحقيقه .. أصل
زقزوق : أصل ايه ما تتكلم ؟
حرفوش : أنا جاي علشان تصبر عليه شويه
زقزوق : نعم يا عيني .. أصبر عليك .. للصبر حدود .. يا حبيبى .. النهارده أخر ميعاد ..
للدفع .. لأبيع بيتك بالمزاد ..
حرفوش : حصلت ظروف وابنى الوحيد صابه مرض خطير .. وصرفت الفلوس كلها
زقزوق : دا مش اختصاصى ..
الزوجه : اصبر شويه عليه يا زقزوق ..
زقزوق : ملكيش دعوة أنتى يا خضره .. أنا بأطالب بحقى يا الدفع يا المزاد
حرفوش : الرحمة يا زقزوق .. دانا صاحب عيال ..
زقزوق : أنتهى الكلام .. قدامك ساعة بالتمام والكمال .. لأما الدفع فى الميعاد لأما نفتح
المزاد ..

الماردان : بقولك ما تستعجلش ..

مارد ٢ : دايمًا مستعجل زى عادته

زقزوق : طب ربحونى وقولو لى أنتوا مين ؟

مارد ١ : هنقولك بس فى الوقت المناسب .. هنخبى عليك ليه ؟

زقزوق : ما هو أنا لازم أعرف انتوا مين .. ولايسين كده ليه .. وجايين هنا ليه اه يكونش

جايين تسرقوا الفلوس بتاعتى .

الماردان : (بضحكان)

زقزوق : لا بقولكم ايه .. دانا أصوت والم عليكم الدنيا ..

مارد ١ : غلبان .. معندوش تمييز ..

مارد ٢ : لازم تعرف يا غلبان .. أن محدش يعرف يشوفنا غيرك .. وطول ما أنتم موجودين

محدش يسمع صوتنا غيرك ..

زقزوق : يعنى دى مؤامرة .. حرام عليكم .. الفلوس دى شقى عمرى

مارد ١ : إحنا مش جايين طمعانين فى فلوسك

مارد ٢ : إحنا ما يهمناش الفلوس.

مارد ١ : ولا بتعنينا أى حاجة من اطماعكم يابنى الانس

زقزوق : امال انتوا مين .. قولولى قبل ما يصيبنى الجنون ..

مارد ٢ : طب ما تخفش .. أحنا هنقولك .

مارد ١ : أنا احلامك

زقزوق : أحلامى .. قصدكم أيه ؟

مارد ٢ : أحنا اللى بتتمناه .. اللى هتطلبه تلقاه ..

زقزوق : ما بلاش الغاز وقولوا انتوا مين ؟

مارد ١ : أنا اسمى عسقلان .. مارد علاء الدين .. قصدى كنت مارد علاء الدين

مارد ٢ : وأنا اسمى زعفران .. مارد خاتم سليمان .. قصدى مارد خاتم سليمان .. ؟

زقزوق : دى نكته صح .. أكيد انتو بيهزروا

مارد ١ : لا .. احنا ما بنهزرش

مارد ٢ : لا .. احنا مبنعرفش الهزار .. كل كلامنا جد فى جد

مارد ١ : اللى زيكم يابنى الانس .. واخدين كل حاجه هزار .. أو دمار

زقزوق : يعنى ده حقيقه مش خيال .. طب لابسين كده ليه زى بتوع الفضاء وبعدين اللى انا اعرفه ان المارد طويل قوى .. وانتوا قصيرين يعنى لامؤاخذه يعنى ..

مارد ١ : أنت لسه عايش فى زمن المارد الطويل .. دا كان زمان .. هو مش الزمن برضه عندكم اتطور .

مرد ٢ : أحنا كمان الزمن عندنا اتطور ..

زقزوق : أه بس أحنا عندنا دلوقتي .. زمن الفضاء والاسلحة النووية والذرية

مارد ١ : والقنبلة البيولوجية والامراض المستعصية والحروب والظلم والطمع يا زقزوق

زقزوق : الله دانتوا عارفين عننا كل حاجه ..

مارد ٢ : لكن احنا التطور اللى عندنا للخير وبس – ومبقيناش عبيد لحد

زقزوق : أه .. علشان كده مقلتشو شبيك لبيك عبدك وبين ايديك

مارد ١ : مش بقولك أنت لسه عايش فى زمن الخيال .. انتوا يابنى الانس اللى خلتونا عبيد ليكم فى خيالكم وحكاياتكم .

زقزوق : أمال بتشتغلوا ايه دلوقتي ؟ .. بتلموا دودة القطن ولا بتجمعوا خوخ ولا شغالين فى أعلانات التليفزيون .

مارد ١ : أحنا مبشتغلش ..

زقزوق : ليه عندكم بطاله ؟

مارد ٢ : أحنا مبشتغلش فى الحاجات دى

مارد ١ : أحنا بنشتغل فى الخير .. نشوف اللى زيك ونحقق ليهم احلامهم ونعلمهم

زقزوق : وأنتوا عارفين ايه احلامى ؟

مارد ٢ : امال احنا جايين ليه

زقزوق : بس انا احلامى كبيره .. يمكن ما تقدروش عليها

مارد ١ : بالعكس .. أنت احلامك صغيره جدا وهايفه جدا
زقزوق : ازای بقى .. أنا عايز جواهر وقصور ويبقى معايا مال قارون
مارد ٢ : دى حاجه سهله قوى
زقزوق : أنت هتهزر ؟ ..
مارد ٢ : قلتك أحنأ ما نعرفش الهزار
زقزوق : طب انا اسف .. متزعش كده حقك عليه
مارد ١ : أحنأ جابين نحقق احلامك
زقزوق : من غير اتعاب كده
مارد ٢ : رشوه يعنى ؟ .. الرشوة دى ما يعرفهاش غيركم يابنى الانس
زقزوق : يعنى من غير ما ادفع ولا ملیم ؟
مارد ١ : طبعا
زقزوق : وایه اللى هیفیدکم ؟
مارد ١ : علشان نعمل خير لازم نعلمك یكون الخير ازای
زقزوق : طب یالله .. خلصوا .. حققوا احلام زقزوق .. فین المصباح أو الخاتم ؟
مارد ١ : مفیش لا مصباح ولا خاتم .. مفیش غیر شرط واحد
زقزوق : أه .. هو ده اللى أنا خایف منه .. أكید طمعانین فی کبایتین شای شرط أیه بقى؟
مارد ٢ : هتیجی معانا ..
زقزوق : أجبی معاکم فین ؟
مارد ١ : مملکتنا .. مملکة الامان وتعلیم الانسان
زقزوق : أه اکید انتوا ناویین تخطفونى وتطلبوا على دیه .. اسمعوا لنا أقول لکم .. أنا
عندى اموت ومدفیش ولا ملیم
مارد ٢ : مسکین یا زقزوق .. أنت ما تسواش عندنا ولا ملیم
زقزوق : طب وأیه یضمن لى أنکم صادقین
مارد ١ : وایه دلیلک على اننا کذابین

مارد ٢ : انتو كده يابنى البشر .. دايما شكاكين وخايفين من المجهول نفسكم تحققوا
احلامكم وانتوا نايمين على السرير ومعكم مصباح علاء الدين من غير ما
تتعبوا فى حاجه .

مارد ١ : الحاجة الوحيدہ اللى بتتعبوا فيها .. انكم تاكلوا فى بعض وتظلموا بعض
زقزوق : طب هاتولنا أى حاجه رهن نخليها على بال ما نرجع .. دى باين عليها مرصعه
بالجواهر الثمينه

مارد ٢ : دى ما تنفعكوش ..

مارد ١ : لو خدتها هتفسدوها .. زى ما فسدتم كل حاجه .. ماتضيعش وقتنا هتيجى
معانا ولا لأ ؟

زقزوق : أصل بصراحة أنا خايف تخدونى تجوعونى .. أوتدفعونى .. ويمكن كمان تؤذنى.

مارد ١ : ماحنا ممكن نأذيك من غير ما حد يحس بينا أو يشوفنا أو يمنعا ..

مارد ٢ : مين يقدر يمنعا .. حتيجى معانا ولا نسيبك ونمشى ؟

مارد ١ : وتروح عليك الجواهر والمرجان والذهب .

زقزوق : هو فيه هناك مرجان ؟

مارد ١ : امال ..

زقزوق : وفيه يا قوت .. ؟

مارد ٢ : طبعا .. فيه كل اللى يتحلم بيه .. كنوز وقصور وكل حاجة يا زقزوق وفيه معلبات

لسه تاريخ صلاحيتها مانتهماش

زقزوق : طب الحقونى بعلبه فول ..

جاي معاكم احقق احلامى ..

إظلام

المشهد الثانى

«فى مملكة الامان .. ثلاثة أبيار متناثرة على خشبة المسرح.. كل ما تتخيله من ديكور واكسسوارات يمكن ان توضع.. حركة دورية لبعض المخلوقات الغريبه..»
زقزوق : الله ايه ده ؟ .. وايه الاشكال العجيبه دى ؟ .. الله امال فين المارد ؟ .. أنا فين ؟
.. يا مارد اظهر وبان وبلاش الحركات دى .. أظهر يا مارد عيب .. داحنا صحاب على الحلوة والمرة .. الله العالم دول مالهم رايعين جايين من غير ما يكلموا بعض .. (ينادى على احدهم) أنت يا أخ ؟ .. لو سمحت والنبي يا كابتن الساعة كام .. طب ماتزقش .. طب لو سمحت ممكن تدليني على حمام .. يا لو با لهوباللى ما حدش بيرد عليه ليه .. هما جابونى عند جماعة خرس .. طب مفيش هنا قهوة نقعد عليها نضيع وقت شويه .. ما حدش يحوشنى ولا يعتب عليه (هائجاً) يا مارد يا عسقلان .. يا ندمان يا شعبان ..

مارد ١ : ايه مالك بتزعق ليه ؟

زقزوق : جرى ايه يا مارد .. أنت جايينى عند جماعة خرس وسبتنى ليه ؟

مارد ٢ : دول مش خرس ..

زقزوق : مش خرس .. امال مفيش حد فيهم عايز يكلمنى ليه .. مخاصمنى ليه ؟

مارد ٢ : لأ طبعا هنا مفيش خصام

مارد ١ : هنا الكل بيحب الثانى بيحب اخوه .

زقزوق : امال ساكتين ليه ؟

مارد ١ : علشان محدش عنده وقت يكلم الثانى أو يرد عليه

مارد ٢ : أو يقعد على القهوة الساعات بتسامر .. ويتكلم على الناس أو يتفرج على

التلفزيون .. أو يسهر على الدش ..

مارد ١ : أهم حاجة هنا العمل ويس .. وساعة العمل الكل بيعمل فى صمت .

زقزوق : طب وقت الفراغ بيقتضوه ازاي ؟

مارد ٢ : فى القراية والاطلاع ..

زقزوق : وهى دى تبقى عيشه .. الواحد لازم ينام طول النهار ويقعد على القهوة طول الليل.

مارد ١ : عادات سيئة يابنى البشر بتضيعوا وقتكم فى كلام فارغ

زقزوق : طب انا مليش دعوه .. أنا عايز الشيكولاته دى . (يضحك المارد) بتضحك على ايه

.. أنا خلاص بقيت مضحكة بتاعتكم ؟

مارد ٢ : لأن دى مش شكولاته ..

زقزوق : امال دى ايه ؟

مارد ١ : ده كتاب شعار المملكة .

زقزوق : على العموم أنا كل اللى يهنى اللى انتو وعدتوني بيه بس .. والا نسيتوا

مارد ١ : ننسى ازاي .. لأ طبعا أحنا فاكرين كويس ..

مارد ٢ : فاضل ثوانى وراحة اهل المملكة تبدأ

مارد ١ : وبعدها نعرفك على كل حاجة

زقزوق : طب وأهل المملكة دخلهم ايه فى الموضوع بتاعنا . مارايحين جايين اهم ..

مارد ٢ : ازاي بقى .. مش هم الشهود

زقزوق : شهود على ايه ؟

مارد ٢ : عليك

زقزوق : هنرجع للالغاز تانى

مارد ١ : دلوقتى هتفهم كل حاجة

(صفاره انذار)

زقزوق : غاره .. غاره الحرب قامت

مارد ١ : حرب ايه يا جدع انت .. مفيش هنا فى مملكة الامان حروب.

زقزوق : امال الانذار ده ايه ؟

مارد ١ : دى صفاره بدأ الراحة ..

(يبدأ أهل المملكة فى الالتفاف حول زقزوق ويحيوه بطريقة غريبة)

زقزوق : ايه .. فيه ايه ؟ .. مالكم بتبسولى بطريقة غبيه ليه .. ايه كونش ده ميعاد غداكم ..

ايه مالكم تكونوا ناويين تكونى .. أو تكونوا من اللى بيكلوا البنأدمين لأ .. دانا

لحمى مر قوى ..

مارد ١ : لأ متخفش .. هما عارفين أن جسد البنى آدم بيتحلل بعد الموت .

مارد ٢ : دول بيرحبوا بيك

الجميع : سلام .. حمام

زقزوق : أنا فعلا بحب الحمام بالفريك ..

الجميع : سيكا سيكا

مارد ١ : حبيهم زى ما بيككموك

الجميع : سيكا سيكا

زقزوق : سيكا مزيكا الفيريكه .. هات منه ثلاث بفرات

مارد ١ : ودلوقتى نقدر نتفق

مارد ٢ : أنت عايز تكون اغنى راجل صح

زقزوق : صح .. ياقوت ومرجان وزمرد

الانسان الالى : هذا الرجل معتوه توه توه ..

زقزوق : بقولك ايه بلاش طولة لسان .. (يضربه) أه .. يا خبر اسود .. دا جامد قوى

مارد ١ : لأنه حديد .. انسان الى

مارد ٢ : علشان توصل للى انت عايزه .. لازم تعرف ايه هى الشروط

زقزوق : معروفه .. اكيد عايزين مقابل ؟

مارد ١ : قلتلك هنا مقيش الكلام ده

مارد ٢ : ولا عندنا بنوك

زقزوق : أه تحت البلاطه .. مانا عارف كل حاجه

مارد ١ : ايه البلاطه دى ؟

زقزوق : دى بلاطة البنأدمين

مارد ٢ : يعنى كل بلاطة مع كل انسان

زقزوق : ما شاء الله .. مارد صايع .. لافف .. ايوه يا سيدى .. كل واحد له بلاطه يحط تحتها الفلوس .

مارد ١ : محدش هنا بيحط حاجة تحت أى بلاطه .. التى محتاج حاجه يخذها من اخوه يأخذ كفايته ويس .. قوته وقوت عياله ويس .. مفيش طمع ..

الالى : ولا يوجد هبر .. هبر .. هبر ولا سبويه ..بويه ..

زقزوق : ايه ده .. الانسان الالى ده قليل الادب .. أنت فين بالضبط

الالى : يا سادة .. هذا الرجل معتوه .. معتوه

مارد ٢ : هنا القناعة والرضا هدف كل واحد فيهم

زقزوق : قناعة .. ايه يابيه .. (لنفسه) دول باين عليهم غير طبعين

الالى : احترم نفسك .. احترم نفسك .. ويطل طولت لسان

زقزوق : الله .. سمعها ازاي دى .. المهم .. خلصوني .. ايه .. الشروط ؟

مارد ١ : عندي .. ياقوت .. ومرجان وذهب .. بس كل حاجة ليها شروطها ؟

زقزوق : قولوا الشروط بسرعة .. أنا مستعجل

الالى : معتوه .. معتوه ..

زقزوق : اسكت أنت .. أحسن ودينى اكسرك

الالى : من فضلكم .. سييوني عليه .. سييوني عليه .

مارد ٢ : ما فيش داعى

زقزوق : أنت زعلت .. دانا بأهزر معاك

مارد ١ : بين كل كنز وكنز بير

مارد ٢ : الياقوت .. بير ميه .. والمرجان بير غسل والذهب بير نار

كارد ١ : وبين كل بير وبير مسافة كبيره ..

مارد ٢ : وعلشان يكون الكنز ملكك لازم تعدى المسافات .. وتعبر الأبيار

مارد ١ : من غير أى دمار

مارد ٢ : وانت بقى عليك تختار .. تاخذ الياقوت والمرجان ولا الذهب ؟

مارد ١ : ولا تحب تأخذ التلاته .. كل حاجة تحت امرك وحسب مقدرتك انت ؟
زقزوق : ياقوت ومرجان وذهب .. وهى دى فيها اختيار .. اخذ التلاته طبعاً
الالى : هذا الرجل طماع .. طماع .. طماع
مارد ٢ : ياله يا بطل .. كل ما هتعدى بير .. تأخذ الكنز بتاعه ..
مارد ١ : بس احنا مش مسئولين عن اللى هيجراك ..
زقزوق : ايه هو اللى هيجرالى .. قولولى
مارد ٢ : متخفش .. مفيش حاجة هتطلعك .. وهتمشى فى امان .. وماعدش هيتعرضلك
الالى : اهبل .. اهبل .. اهبل
مارد ١ : ياله يا بطل .. أنت اخترت ولازم تجرب بنفسك
زقزوق : اوكيه .. وهيجرالى ايه .. دا بير ميه وبير غسل ونار .. انا بقى زقزوق الجبار..
الالى : معتوه .. معتوه .. معتوه ..
مارد ٢ : بس خلى بالك .. لو عديت بير الميه وبير الغسل .. أوعى تنسى كمان بير النار
تعديه على طول .. ولا هتكون نهايتك
زقزوق : ابدا .. دى لازم تكون البداية .. أول ما اشوف الجواهر .. تعدى كل الحواجز ..
كارد ١ : يعنى موافق على الشروط ؟
زقزوق : موافق وستين موافق.
مارد ٢ : طب استعد للانطلاق .. نقطة البداية هى نقطة النهاية ..
زقزوق : مش فاهم ؟
مارد ١ : يعنى النقطة اللى هتبدأ منها هى النقطة اللى هترجع ليها
الالى : هل فهمت .. فهمت .. فهمت
زقزوق : نعم فهمت .. فهمت .. فهمت. ودلوقتى هنطلع معاك دليل من عندنا والانسان الالى
علشان يرشدك
زقزوق : ابو لسان طويل .. متشوفولنا حاجة كويسه
الالى : لن أصحاب هذا المعتوه .. أنا زعلان .. زعلان .. زعلان اريد ان ابكى .. ابكى ..
ابكى .. انى اغرق فى دموى .. انى
زقزوق : يا ريت يأخى تغرق وتخلصنى منك

مارد ١ : مصيبة .. كارثة
زقزوق : مصيبة ايه وكارثة ايه ؟
مارد ٢ : أنت عارف اللي عملته ده ايه ؟
زقزوق : عملت اه .. قلت مش عايز الانسان الحديد ده فزعل
مارد ١ : وعارف زعله ده معناه ايه ؟
زقزوق : معناه ايه يعنى ؟
مارد ١ : معناه أن الرحلة بتاعتك مش هتتم
زقزوق : ليه بقى ؟
مارد ٢ : لأن هو اللي هيحميك فى الرحلة .. من أى اخطار تواجهك .. وهو اللي يحملك
المؤمن معاه
مارد ١ : ويحدد لك اتجاه الرحلة
زقزوق : يا نهار مش فايت .. طب والعمل ؟
مارد ١ : حاول تصالحه
زقزوق : الامر لله .. أنت يا عم الالى .. حقك عليه .. أنا غلطان ..
الالى : لا اريد التحدث معك .. ابعد عن وجهي .. ابعد .. أنت لا تعنى ما تقول
زقزوق : اوعدك .. أن أول ما احصل على الجواهر .. هجبلك انسانيه اليه وهجوزها لك
خلاص بقى حقك عليه
الانسان : سوف اسامحك هذه المرة .. اياك أن تعاود الالهانه مرة أخرى
زقزوق : الحمد لله .. اهو تصالح ..
الماردان : والان استعد للانطلاق ..

المشهد الثالث

المنظر : مكان يبدو غريب الشكل ويمكن لمهندس الديكور أن يتخيله كيفما يشاء بشكل بعيد

عن الواقع .. على خشبة المسرح يوجد ثلاثة ابيار متناثره .. يدخل زقزوق ومعه

نجمه والانسان الالى وهو شبه منهك القوى)

نجمة : كفاية يا زقزوق .. نستنى هنا شويه ويعدين نواصل مشوارنا ..

زقزوق : جرالكم ايه مدو شويه

نجمة : نمد ايه .. دانت كسرت رجلينا ..

الالى : انتظر .. انتظر .. يجب أن تستريح ..

نجمه : شايف .. حتى الانسان الالى الحديد تعب من المشى

زقزوق : بقولكم ايه .. انتوا عايزين تضيعوا على بير المرجان .. أنتوا هنا علشان تسمعوا

كلامى وبس

نجمة : ما كفايه عليك بير الياقوت ..

زقزوق : لأ .. أنا لازم اخذ الياقوت والمرجان والذهب كمان

الالى : يجب ان تستريح .. حجارة المشى أوشكت على الانتهاء

زقزوق : مش مهم .. نبقى نحطك بدالها اربع حجاره طوب

الالى : لا تسخر منى يا معتوه .. الامر خطير ..

زقزوق : وبعدين فى طولت لسانك دى بقى ؟

نجمه : أنا تعبت قوى يا زقزوق .. وبعديت لو خلصت حجاره الانسان الالى مش هنعرف

نمشى ولا خطوه .. لأن بداخله جهاز تحديد الاتجاهات .

زقزوق : طب بقولك ايه .. هو فاضل كتير على بير العسل .. اللى هيتحول لمرجان
نجمه : باقى ييجى ميل ..
زقزوق : طب بسرعه .. خلينا نوصله قبل الليل ما يعدى .. علشان نلحق بعد كده بير الميه
.. اللى هيتحول لذهب .
الالى : (صارخا) .. اتهد بقى يا اخى ربنا يهدك .. انت ايه ما بتتهدش ابدًا
زقزوق : ايه يا جدع انت .. بتشخط كده ليه ؟
نجمه : كده يا زقزوق خلّيت الحديد ينفع ؟
زقزوق : طب ما ينفع وانا مالى
نجمه : عارف انفعاله ده معناه ايه .. معناه أنه بيبدل طاقة أكبر وأكبر .. وكده حجارتة
ممکن تخلص بسرعه
زقزوق : عطشان عاوز اشرب معاك ميه ؟
نجمه : مفيش غير شربتین بس ..
زقزوق : طب هايتهم بسرعه
نجمه : ما ينفعش ..
زقزوق : ليه بقى
نجمه : لان شربه لحارس بير العسل .. وشربه لحارس بير النار ..
زقزوق : يا وقعه سوده .. طب مفيش معاكم دولسى من ابو عشره صاغ اللى بيحبيب
التيفود
نجمه : مبنستعملوش
زقزوق : مش مهم .. بكره لما املك الياقوت والمرجات والذهب .. اجيب كل اللى نفسى فيه
الالى : البلوة كبيرة ..
زقزوق : بلوة ايه يا جدع انت ؟
الالى : أنت بلوه فى حد ذاتك .. بلوة .. بلوه ..

زقزوق : ماشى يا طويل اللسان .. ودينى لما املك الجواهر .. لا تشتري منك عشرة انسان
ألى وأكسرهم بالعصايه .. لا عصايا ايه .. مرزبه .. أه يانى .. تعبت قوى
بقولك ايه يا نجمه متخلى الانسان الالى يشيلنى
نجمه : مهو كله منك .. أنت اللى تعبت نفسك
زقزوق : بقولك ايه يا استاذ الى .. ممكن تشيلنى واديك وصل امانه بعشر حبات مرجان
الالى : أنا لا احمل معاتيه
زقزوق : كده !! طب ودينى لاقطع نفسك
نجمه : كفايه .. كفايه يا زقزوق .. أديك قربت من بير العسل .. (يخرج من بئر العسل
حارس البير)
الحارس : ميه .. عطشان .. ميه
زقزوق : هو انت تانى .. أنت ايه حكايتك معايا .. مش انت اللى طلعت من بير الميه وطلبت
ميه
نجمه : دا حارس البير يا زقزوق .. ولو ما سأتفهوش ميه .. مش هيحول بير العسل لمرجان
زقزوق : لأ والنبي .. اديله شربت ميه ..
نجمه : بس خلى بالك كده هيفضل شربت ميه واحده ولسه الطريق طويل .. وممكن تعطش
وتموت من العطش ..
زقزوق : أنا عمرى ما اموت من العطش ولسه شايف قدامى الياقوت والمرجان والذهب
نجمه : على العموم انت حر .. خد أشرب يا حارس ..
(الحارس يشرب)
زقزوق : بالله بقى عدينى .. والمرجان ودينى .
الحارس : (يحملة ويعدى بيه البئر)
زقزوق : مرجان مرجان .. بقى عندى بير ياقوت وبير مرجان وفاضل بير الذهب ولازم
احصل على التلت ابيار .. ولازم احقق كل امالى ..

المشهد الرابع

المنظر : (نفس المنظر)

نجمه : حرام عليك يا زقزوق .. أنا خلاص ما عنتتش قادره امشى

زقزوق : ولا انا كمان أه يا رجلى عطشان

نجمه : مفاضلش غير شربه فيه واحدة .. تخدها بس خلى بالك حارس الذهب مش

هايشرب فيه

زقزوق : لأ خليها له .. أنا أحسن لى استحمل الجوع العطش ولا يضيع منى بير الذهب

هو فاضل كتير على بير الذهب .

نجمه : لما اسأل الانسان الالى؟ يا ألى .. فاضل كتير على اخر بير .. (لا)

زقزوق : هو ما بيردش ليه .. جراه ايه ؟

نجمه : ابدأ الحجارة بتاعته ضعفت ومبقاش يسمع ولا يستجيب ..

زقزوق : يا وقعه مره .. طب والعمل .

نجمه : ربنا يهدك .. حتى الحديد هديت حيله

زقزوق : طب زعقى شويه .. يمكن يفوق ويسمع ..

نجمه : زعق انت أنا مش قادره ..

زقزوق : فاضل كتير على اخر بير .

الالى : لح .. لح .. لح ..

زقزوق : لحمه ايه .. دا باين عليه جاع وخرف

نجمه : ليه حق .. المشى اللى مشيناه يهد جبل مش حديد

زقزوق : طب يا للا احنا نواصل المشى علشان نقدر نوصل فى الميعاد .

نجمه : مفتكرش نقدر نمشى ؟

زقزوق : ليه ..

نجمه : ليه .. لاننا مش عارفين الاتجاه .. الا عن طريق الانسان الالى وحجارته خلصت

وشويه ويقع على الارض

زقزوق : يا لهو بالى .. كده هاتضيع امالى

نجمه : مانت حققت جزء كبير منها .. أنا من رأى كفاية كدة

زقزوق : لا .. أنا لازم احقق كل امالى ..

نجمه : يا زقزوق .. كل ما نتأخر عن الميعاد هيوسع بير النار

زقزوق : نعم ياختى دا ماكنش فى الاتفاق .

نجمه : ده صحيح .. بس اللى حصل اننا اتأخرنا كتير

زقزوق : وانا ذنبى ايه .. انتوا مديينى انسان الى خرع وفافى .. المهم العمل ايه دلوقتى

نجمه : مفيش غير اننا نزود الانسان الالى بالوقود

زقزوق : طب وهنجيبه وقود منين .. داحنا فى مكان مقطوع .

نجمه : نديله .. نصف شربه ميه .. والنصف التانى نخليه لحارس بير الذهب

زقزوق : يا خبر اسود .. بس انا كمان عطشان ..

نجمه : والله مفيش حل غير ده .. لاما نرجع تانى

زقزوق : لا .. كله الا ده .. اسقيه شويه الميه دول .. حر ونار فى جتته الحديد

نجمه : يا خبر ابيض ..

زقزوق : فيه ايه تانى ؟

نجمه : دول يا دوب يخلوه ينطق كلمه واحدة

زقزوق : ده كده مش هيلحق يعطس

نجمة : علشان كده لازم سؤالنا يبقى محدد
زقزوق : طب جربى بس .. وحياء ابوكى ركزى معاه .. ربنا يسترها ويهديك يا الى
الالى : نع ... نع ..
نجمة : ياخبر .. اديك ضيعت الكلمة .. افكر أنك بتنادى عليه فقالك نعم
زقزوق : نعم الله عليكى ياختى .. طب والعمل
نجمة : مفيش بقى غير أننا نديله شوية الميه الباقية وتعدى أنت بحر النار عايم
زقزوق : عايم عايم .. بس خلصنا ..
نجمة : نسقى الإنسان الآلى شوية الماء اسكت أنت يا زقزوق أوعى تتكلم ولا كلمة سبنى
أنا أسأله .. أين الاتجاه يالى؟
(الالى يشاور لها على الاتجاه)
نجمة : كده .. عرفنا الاتجاه .. ياللا يا زقزوق ..
زقزوق : أنا عطشان مش قادر استحمل
نجمة : استحمل .. فات الكثير ميقاش إلا القليل .. المهم التعب ما يضيعش ادى احنا قربنا
من بير الذهب .. بينك وبينه أربع خطوات
زقزوق : أنا مش قادر اتحرك خطوة واحدة ..
نجمة : شد حيك أمال .. أمشى خطوة كمان ..
زقزوق : مش قادر عطشان .. عطشان .. تعبنا ..
نجمة : للأسف مفيش ولا شربت ميه .. حاول مرة تانية
زقزوق : المال فىن حارس بير الذهب .. مظهرش ليه لحد دلوقتى ..
نجمة : وهيظهر ليه مهو احنا ممعناش ميه
زقزوق : طب والعمل مين هيعدينى بير النار ..
نجمة : لازم تعدى أنت بنفسك

زقزوق : هو أنا قادر اتحرك لما اعدى بنفسى
نجمة : خلاص .. استغنى عن بير الذهب
زقزوق : نعم ياختى اعمل ده كله وبعد كده تقولى استغنى عن الذهب.. أنا لازم اعدى
(يحاول أن يملس البير)
زقزوق : أه يا أيدي.. أيدي اتحرقت .. مش قادر احركها.. مش قادر .. شوفولى حل
(يظهر الماردان..)
الماردان : الحل كان فى أيديك يا زقزوق
زقزوق : انتوا فين كده تعملوا فيه كده
المارد ٢ : احنا معملناش فيك حاجة
المارد ١ : أنت اللي عملت فى نفسك كده
المارد ٢ : احنا خيرناك وأنت اللي اخترت
زقزوق : طب أنا عيل وغبي.. انصحونى ..
المارد ١ : ياما نصحناك وحذرناك.. مسمعتش كلامنا
زقزوق : ارجوكم ساعدونى..
المارد ٢ : نساعداك ازاي ..
زقزوق : عدونى بير النار ..
المارد ٢ : معدش ينفع .. عمرك ماhtعدى لبر الأمان
زقزوق : أنت مش بتحبوا الخير .. اعملوا فيه خير وخلصونى
المارد ١ : الخير اللي عندهم استعداد للخير
زقزوق : ارجوكم.. اتوسل اليكم . حاولوا تسعدونى.. ايديه اتحرقت.. رجلى اتشلت مش
قادر احركها
مارد ٢ : احنا فعلا حاولنا نساعداك ..

مارد ١ : حاولنا نشوفلك فعل خير واحد.. سألنا ناس كتير
مارد ٢ : يمكن تكون فى يوم سقيت واحد شربت ميه
مارد ١ : أو اعطيت واحد لقمة عيش حاف.. أو قرش مصدى
زقزوق : ملقتوش حاجة خالص ..
مارد ١ : للأسف ملقناش ..
زقزوق : نعم.. لأ بقى فيه .. أنا فاكرك كويس.. أنا مرة ادبت واحد حلة فول مدمس
مارد ٢ : ده كان علشان .. ينقيلك السوس اللى فيها
زقزوق : طب بقولكم ايه .. مينفعش حارس البير ياخذ نص جرام ياقوت ويعدينى
مارد ١ : للأسف.. الياقوت والمرجان ماينفعوش هنا..
زقزوق : طب اسقونى شربة ميه
مارد ٢ : مفيش .. مفيش قدامك غير أنك تشرب من ميه النار
زقزوق : انتوا عايزينى اموت ..
مارد ٢ : مش أحسن ماتموت من العطش..
زقزوق : طب شو فولنا حل تانى ..
نجمة : مفيش بقى قدامك غير أنك تتنازل عن الذهب.. يقوم يتحول بير النار لميه وتشرب
زى مانت عايز
زقزوق : دا لا يمكن أبداً.. أنا لازم أعدى البير بنفسى
(يحاول أن يلمس البير بده اليسرى) أه يا ايدى ايدى الشمال اتحرقت ومش
قادر احركها
مارد ١ : دى كام محاولة لعبور البير
نجمة : دى المحاولة الثانية
مارد ٢ : المحاولة الثانية يا خسارة يا زقزوق ..

ماردا ١ : عارف ده معناه أيه .. أن المحاولة الثالثة هتقع فى بير النار وتتحرق

زقزوق : واموت ؟

ماردا ١ : للأسف لأ .. هتنتشوى بس

زقزوق : لأ أنا مش عايز اتشوى .. مابحش الفراخ المشوية .. رجعونى تانى

نجمة : معدش ينفع .. تتقدم آه .. ترجع لأ

زقزوق : يعنى ايه ؟

ماردا ١ : يعنى مفيش اختيار .. مفيش ليك ولاعمل خير واحد نرجعك بيه .. أنت اتحكم

عليك العذاب

زقزوق : أنا مش عايز الياقوت ولا المرجان ولا الذهب .. بس رجعونى تانى لبر الأمان

ماردا ٢ : ده كان زمان يا إنسان .. لما كنت فى أرض الأمان .. لكن ماعملتش حساب غلبان

أو جعان ..

زقزوق : طب أنا عطشان خدوا الياقوت والمرجان واسقونى ..

ماردا ١ : قلنا لك الحاجت دى ماتنفعش هنا .. شوية الميه بشربة مية .. لو كنت يوم سقيت

واحد عطشان ..

ماردا ٢ : أو عملت خير فى إنسان

نجمة : كان ممكن توصل لبر الأمان

زقزوق : حرمت خلاص .. معنتش هاظلم إنسان .. وهاجور على غلبان .. هاسقى العطشان

واطعم الجعان

ماردا ٢ : فات الأوان يا زقزوق .. بعد دقيقة واحدة هيطلع عليك حارس النار يرمىك فى

النار

زقزوق : أنا مش عايز اتشوى .. رجعونى تانى ..

ماردا ١ : مسكين يابنى الإنسان .. تفتكر أن السعادة فى جمع المال ..

مارد ٢ : تنسى نعمة ربنا عليك ..
زقزوق : جاهل وغبي .. آخر مرة .. بس سامحوني .. رجعوني تاني .. للأرض .. للناس
الطيبين اللي أنا ظلمتهم .. أعمل خير وأرجع ليهم حقهم.

مارد ١ : معدش ينفع

اللي : كذاب .. كذاب

زقزوق : أشمعي في دي صوتك طلع ..

نجمة : استعد يا زقزوق .. حارس بير النار .. (؟؟)

«يظهر حارس بير النار ويتجه نحو زقزوق»

زقزوق : لا مش عاوز أتشوي مش عاوز أموت ويحملة الحارس ويلقيه من بير النار

يا خسارة يا إنسان

ادي نهاية الطمعان

نهاية الظالم

خلوا بالكم كلكم ومايقاش حلمكم زي حلم زقزوق

شهر وفواكه

(مسرحية أطفال - عرائس)

هاجر حسين

مشهد ١

(حديقة داخل قصر.. بها مجموعة من الزهور وأشجار الفواكه)

الفواكه : (فى صوت غنائى جماعى)

إحنا الفواكه فى الفصول الأربعة
خريف شتاء.. ربيع وصيف
ثمـارنا حلوة مـلـوعـة
إحنا الفواكه فى الفصول الأربعة

المشمش :

مشمش مشامش مشمشى
مشمش أنا
الى ياكلنى ينتشمش
ولا ينسـانـيش طول السنة
مشمش مشامش مشمشى
يالله كلونى بالهنا

البرتقالة :

وأنا أبقى البـرتـقالـة
وإخـواتـي يوسـفـى ولونـة
ضد البـرد تلاقـونا
وأنا بيـجى فى الشـتـا

العنب :

وأنا العنب عنب عنبى
كل الفواكه أصحـابى
ضـلـيلة حلوة لطلـابى
فـيـتـامـين الجـسم أنا

الفراولة :

وأنا فــــراولة فــــراولة
خــــدودى حــــمرا وجميلة
مــــشروب مــــفضل للعيلة
أنا الفــــراولة .. فــــراولة أنا

المانجو :

مانجة مانجة وجيت أغنى
حبايبي ياما قالوا عني
طعمي جنان .. شفا للعيان
أنا المانجة .. المانجة أنا

الموز :

أنا الموز بن ســــبــــاطة
مــــعــــوج وبأمشى بالأطاة
وحيث أن فــــوايدى كــــتــــير
خــــدودنى كلونى أنا

(تدخل بطيخة وهى غاضبة فتخرج كل الفواكه)

بطيخة : إيه الحكاية؟ الدنيا هايصة كده ليه؟ فيه إيه؟ الشمس لسه ما طلعتش وعالكون
مانتشرتش.. وكل دى غاغة وكلام .. فواكه فاضية.. لما أرجع لعروشى أنا.

شمامة : صباح الخير يابطيخة يا أختى.. كويس إنك صحيتى بدري من غير ما حد
يقومك .. ده أنا كنت شايلة هم صحيانك بشكل .. نومك ثقيل أوى يابطيخة.. كل
ما أصحيكى ترجعى تنامى وتعملى غرقانة فى النوم.

بطيخة : خلاص ؟ قلت كل اللي عندك؟(تتثائب) أنا داخلة بقى أنا.. مش كفاية قومتونى
من عز الأحلام؟

شمامة : ياخبر ياخبر!! إنتى حتنامى تانى؟ أنا كنت فاكراك صحيتى لوحدهك وحتيجى
معانا .. لكن مافيش فايده..دايما كسلانة.

بطيخة: إوعى كده .. بلاش كلام.. خلينى أدخل أنام وأنام وأنام

(تدخل مانجو)

مانجو : صباح الخير على الأختين.. شمامة وبطيخة الطوين.. مالك يابطيخة بتبرطمي

ليه؟ فيه إيه؟؟

بطيخة : بصراحة كده.. إنتو النهاردة أمركم غريب وآخر رزالة.. سيبيونى أكمل نومى

وروحوا إحكوا بعيد ياساتر عليكوا.. تصبحوا علي خير.

مانجو : حد ينام يابطيخة والنهار طالع! وفى يوم العيد !!

شمامة : بتتكلمى مع مين؟ دى زمانها فى سابح نومة.. دى ممكن تنام وهي بتكلمك..

أصلها كسولة وخم نوم حتلاقيها بين الأوراق نايمة ومتغطية بعروشها ولا يهملها

عيد ولا غيره.

مانجو : ياخسارة.. كان نفسنا نتجمع كلنا عند أحواض الورد عشان نصبح ونعيد

عالأميرة الجميلة شمس النهار ونقولها كل سنة وإنتى طيبة.

شمامة : هوه إحنا نقدر نتكلم بلغة البنى آدمين؟!

مانجو : نتصرف بأسلوب راقى جميل.. يوصل لها قصدنا .. وهى أميرة ذكية أكيد

حتفهمنا

(يتكرر مطلع الأغنية الافتتاحية)

مشهد ٢

(في غرفة نوم الأميرة الملك والوزير يقفان بجوار السرير ويجوارهما الملكة تبدو علي الملك إمارات القلق والخوف والحيرة)
الملك: أنا عايز أعرف ايه اللي جرى للأميرة شمس النهار!! من فترة وأنا شايفها في النازل.. لا بتاكل ولا بتشرب ولا حتى في البستان بتخرج.. كان حبها وإهتمامها للزهور والثمار.. إيه اللي جرى؟ ليل نهار في السرير.. والوجه شاحب وجسمها أصبح هزيل وأنا عقتلى احتار مش قادر علي التفكير ولا حتى أخذ قرار.. دبرنى ياوزير

الوزير : الحقيقة الأميرة شمس النهار من فترة في النازل
الملكة : حتى إبتسامتها الحلوة نستنيها!! أصبحت دبلانه.. وصوتها من المرض خفيض.. لو أعرف السبب ولا ايه العله يمكن كنت هديت
الوزير : نطلق منادى في المدينة لكل أطباء المملكة بأمر ملكي يحضروا ويشوفوا حالة الأميرة ويقولوا لنا العلة إيه.. ويبقى إيه المرض العضال اللي خلاها في ده الهزال.. وحالة غير الحالة دايمًا باكية وتعبانة.. مرضانة وعيانة..

الملك : وهو كذلك ياوزير بس حذارى من الطبيب اللي راح يوصف لحال الأميرة علاج غلط أو يشخص لها الحالة غلط.. واللى راح يعالجها له من الملك هدية عظيمة وأمر ملكي يكون طبيب القصر واللى راح يدعى الطب والحكمة ويقلق راحتها ويسوء حالتها رقبته هتكون التمن.. يقطعها له السياف وتتعلق على باب المدينة عبرة وعظة.. مفهوم ياوزير؟؟

الوزير : مفهوم يامليكى وملك البلاد

المنادى : يا أهالى المدينة.. يا أحباء الأميرة شمس النهار.. الأميرة بتعانى من المرض
ومليك البلاد محتار.. قام اصدر قرار لكل حكيم وطبيب فى المدينة إن كان يقدر
يعالج الأميرة والرب يكتب لها على إيديه الشفا له هدية من الملك عظيمة.. واللى
راح يخاطر بعمره ويغامر ويدعى الأسباب ويقول كلام غير الحقيقة هتكون رقبتة
سبقاه ومتعلقه علي باب المدينة.. يا أهالى المدينة أنا بلغت بالأصول وما على
الرسول وأنت عليكم التأنى والهدوء وإوعوا تقعوا فى المحذور وقد اعذر من
أنذر.

مشهد ٤

(الفواكه وقد تجمعوا فى حديقة القصر)
ليمونه : إيه الحكاية ياتفاحة؟ لا أنا سامعه أغانى عصفور الكنارى وأصحابه ! ولا صوت
الهدهد... ولا حتى شمه للزهور والورد أى عبير.. معقول الجو الساكت الكئيب
ده!! حتى فى يوم العيد ، عيد الربيع!! عيدنا وعيد الزهور والطيور ؟ وفين
الأميرة شمس النهار الجميلة وهى طله علينا بإبتسامتها وحنينها؟ فيه إيه
حصل؟

(صباغ الموز قادما من بعيد نحو الفواكه وهو يجرى لاهثا ومضطربا)
صباغ الموز : سمعتوا اللى حصل يافواكه البساتين.. سمعتوا الخبر الحزين؟
فراولة : قول صفرت لونى وخدودى ياتعيس
الفواكه : (فى صوت جماعى) فيه إيه ياصباغ الموز؟
صباغ الموز : يؤسفنى...
الفواكه : إنت لسه هتعمل لها مقدمة؟ يؤسفنى إيه؟ إنطق وقول من غير بروتكول وأصول..
إتكلم بسرعة..

صباغ الموز : الأميرة شمس النهار....
الفواكه :مالها؟
صباغ الموز : مريضة مرض شديد ياعينى.. ويتعانى من ألم المرض والمناذى بينادى فى
البلد لى يقدر يعالجها.. ومن أزمته يخرجها ويخلصها.. له جايزه كبيرة من
الملك والدها

الفواكه : (وهى تبكى) ألف سلامة على الأميرة صاحبة القلب الكبير
مانجة : بقى الأميرة.. اللى طول عمرها مراعيانا.. وبحبها وإهتمامها شاملانا.. تمرض
كده ولا حد يدري؟؟

البرتقالة : عمرى ما هنسى وقفته فى الموسم اللى فات لما كان البرد بيتلفنا والآفات
بتمرضنا.. وقفت إيدها بإيد الجناينى تعالجنا وتحوط علينا وتراعيانا.. دى

الأميرة صاحبة مشاعر رقيقة وحنينة.

فراولة : وأنا لما العواصف كسرت من أغصاني وكنت من الكسر بعاني أهتمت بيا ورعتني لغاية ما الكسر خف.

بلح : أنتم متقعدوا تبكوا وتعدوا وتنوحوا ؟ وللا بسرعة تفكروا في الحل.

فراولة : أنا عندي فكره.. لو نفذناها صح كل شيء هيتم على الوجه الاكمل.. والأميرة شمس النهار تخف.. وترجع لنا بالسلامة.

اليوسفي : هي إيه الفكرة يا فراولة يا صديقتنا؟

فراولة : الهدهد صاحب مين فينا الروح بالروح وتقريبا ساكن عند مين؟

برتقالة : عند مين؟ عند عنب وطول النهار على أغصان العنب بيتنقل ويطير ويغنى ويذكر ويسبح لرب الكون بصوت جميل بين عناقيد العنب الكثير.

فراولة : يبقى تمام

برتقالة : هو إيه اللي تمام؟؟

فراولة : إن العنب يتوسط لنا عند الهدهد ويخليه يطير يشوف حالة الأميرة إيه.. ويبجي يفكر معنا في حل ننقذ بيه الأميرة

الفواكه : (في صوت جماعي) أحلى فكرة.. برافو يا فراولة على أفكارك النيرة
الهدهد : (يغنى)

أنا لما دخلت البسستان
لقيت خضارة بهتان
ولتبديل شدو العصافير
بكا وأحزان

صباح الموز :

وأنا اللي كنت بأبقى في أجمل حالاتي
ومعايا الفواكه اخواتي
سعدا بقدموها علينا
ولما كانت بابتسامتها تطل
ولا ألف عنقود فل

الفراولة :

وأنا كان بيــــــــــــــــعجــــــــــــــــبني لوني
لأن فــــــــــــــــيــــــــه من لون خــــــــــــــــدودها
ولا لما كان يسعدنا صوتها وهي بتنادي علينا

المانجة:

البســــــــــــــــتان ده كان جنة وخميلة
وفــــــــــــــــرحــــــــــــــــة جــــــــــــــــمــــــــــــــــيلة
يارب ترجع الأمــــــــــــــــيرة لينا

الهدهد: اسمعوا يا فواكه المواسم، الأميرة شمس مريضة ومرضاها محتاج لشجاعة وتفاني منكم ، هي عندها أنيميا يعنى ضعف عام وجسمها مبقاش فيه مقاومة ولا حتى قدرة تقف على رجليها.

الفواكه : الحل إيه يا هدهد يا صديق؟؟

الهدهد: إدوني فرصة ساعتين وبعدين هقول لكم، لكن قبل كده أنا لازم أدي لطباخ الأميرة التخين درس فى الأمانة وأعلمه إيه تكون نتيجة الخيانة.

تفاحه : تصدق؟ أنا من زمان وأنا بشك فى الطبّاخ مسعود المسعود اللي بياكل أكل الأميرة ويشرب اللبن ويقول لها.. لا بكرة ولا جاموسة فى المملكة عندها لبن كلهم ضرورعهم ناشفة وفاضية.. وهو اللي بيشرب اللبن كل يوم ويقول مفيش.

فراولة : أنا كنت حاسة إن الطبّاخ بيكره الأميرة ونفسه يقضى عليها، أكيد فيه أعداء للأميرة والطباخ ده منهم.

الهدهد: لكن معلش.. فيه حل.. إستنوا على

مانجة : أنا ليه عندك رجاء وأمنية

الهدهد: أأمرى يامانجه عايزه إيه؟

مانجه : ساعدنا عن طريق الساحرة العجوزة اللي ساكنة فى آخر المدينة فى أعلى قمة فوق الجبل طير لغاية هناك وقول لها تساعدنا بأى شكل ندخل للأميرة على إننا أطباء جايين نعالجها.

الهدهد : أوعدك أنى أحاول ..دلوقتى أقول لكم إلى اللقاء.. إلى اللقاء.

مشهد ٥

(فى حجرة الساحرة على أعلى قمة الجبل جلست الساحرة وقد أشعلت النار
والبخور وهى تعزم بطلاسم السحر وتقول)
الساحرة : يا قادر .. إمنحنى القدرة والمساعدة لأحول هذه الثمار إلى أجسام بشرية حتي
يدخلوا على الأميرة شمس النهار المريضة مخدعها .. ويتمكنوا من رؤيتها
والاطمئنان عليها وإعادة الإبتسامة إلى شفيتها .. ياله يا قادر يا حى يا قيوم.
(الدخان يملأ المكان والخمسة أنواع من الفواكه تتحول لأجساد بشرية)
الهدهد : تمام كده ياستنا ياللى علينا حنينة وسحرك الحمد لله نفعلنا ولا ضرنا
الساحرة : دلوقتى المأمورية بالنسبة لكم أصبحت سهلة .. خمس أطباء متجهزين بأدوات
الطب والباقي عليكم أنتم فى إقناع الملك والأميرة وأوعو.. تعدى عليكم لحظة
الغروب بعدين السحر يتفك وقوته تصبح عقيمة .. تمام يا أطباء الأميرة؟
الفواكه الخمس : تمام ياستنا ياللى جميلك علينا
الهدهد : وأنا أسير جميلك ومعروفك
الساحرة : يللا بقى نفذوا الخطة وعجلوا .

مشهد ٦

(الأميرة مريضة فى حجرتها وبجوارها الملك والملكة تبكى لمرض ابنتها)
الملكة: ربنا الشافى المعافى يا شمس النهار قادر يشفى عنك (يدخل الحاجب)
الحاجب: مولاي الملك.. خمس أطباء أغراب يطلبون الإذن بالدخول يامولاي
الملك: أطباء أغراب ! بس ياترى عرفوا الشرط؟
الحاجب: ما عرفش يامولاي
الملك: خليهـم يدخلوا
الأطباء: السلام على ملك البلاد.. والرحمة من رب العباد.. أن يشفى الله الأميرة شمس النهار من هذا المرض العضال.
الملك: أهلا وسهلا بالأطباء.. أتمنى تقدروا تعالجوا الأميرة من المرض لأنى لغاية الآن معلق على باب المدينة عشرات الرقاب.. محدش للحظة دى وصف للداء الدواء وفشلوا جميعا فى علاجهم وقدامكم فرصة تراجعوا نفسكو وإلا هتلاقوا نفسكو قدام السياف خطاف متجمعين
الأطباء: إن شاء الله تأذن لنا يامليك البلاد بعلاج الأميرة وربنا معانا يقدرنا على علاجها وشفائها وترجع تاني ورده مفتحة.
الملك: أنا حذرتكم وملكمش عندى أى عذر وأى ذنب
الأطباء: بعد إذن جلالتك يامليك البلاد نبدأ
الملك: إتفضلوا وأنا معاكم قاعد وياكم
الأطباء: السلام عليكم يا أميرة البلاد.. بسم الله نبدأ الكشف
الملك: الهزال هد صحتها ، ده يادوبك اللى يحسسنا إنها لسه على قيد الحاة النبض.
الأطباء: حالة الأميرة بسيطة.. وإنشاء الله لو اتبعت التعليمات وواظبت على العلاج هترجع أحسن مما كانت
الملك: عندها إيه ؟
الأطباء: سوء تغذية وأنيميا حادة.. ويلزمها تاكل وتشرب عصاير طازة ولبن، واللحم والطيور والأسماك لابد تكون موجودة ضمن وجبات الأميرة.. وفى خلال أسبوعين نقضى على مرض الأنيميا اللعين وكل شىء يرجع بمشيئة الله تمام،

وياربت تتمشى شوية فى البستان.

الملك : بسيطة ده احنا عندنا فى القصر أعظم بستان وأندر فواكه من أجود الأصناف

الأطباء : شكرا يامولاي، دلوقت الأميرة محتاجة كياية كبيرة من عصير الليمون الطازة..

وبعد ساعتين تاكل طبق فواكه مشكل بالهنا والشفاء .. وبعد يومين هنمر تاني

نشوف الحالة ونطمئن علي الأميرة

الملك : ربنا يطمنكم زى ما طمنتوني على وحيدتي ولية عهد الملكة.

الملكة : الحمد لله.. ايديكم فيها الشفا وعنيها فتحت واللون اتغير وجسمها اتحرك ودبت فيه الحياة.. إنتوا ليكوا عندي مكافأة كبيرة

الأطباء : إحنا مكافئتنا شفاء الأميرة.. ورجوعها تنور البستان.

الملك : إنتوا مين وجايين من أى البلاد؟

الأطباء : إحنا من البستان يامولاي

الملك : مملكة البستان ! أول مرة أسمع عن الملكة دى

الأطباء : إحنا الفواكه أحباب الأميرة.. والساحرة الطيبة ساعدتنا نتحول لأطباء عشان نساعدنا .. ومع غروب الشمس حنتحول تاني لفواكه

الملك : مش معقول ! شىء أغرب من الخيال

الملكة : لكن إيه اللي خلاكوا تعملوا كده وانتوا عارفين إن دوا الأميرة إنها تاكلكوا؟

الفواكه : جينا نقدم نفسنا برضا وحب وولاء وصدق لأميرتنا المحبوبة شمس النهار اللي ياما أهتمت بينا وخافت علينا وحممتنا من البرد والرطوبة وسالت علينا كتير جه اليوم اللي نقدم لها بعض من الجميل.. وبعدين ربنا يبارك فينا كل ما الإنسان ياكل مننا تكثر ثمارنا وتزيد احنا فدا الأميرة لجل ما تعود من تاني ليها الصحة والعافية.. نستأذن دلوقت وهنجى إنشاء الله في الميعاد وهنجيب من كل الأصناف الباقية المطلوبة للأميرة.. استودعكم الله.

الملكة : خليكوا معانا شوية

الفواكه : الغروب قرب يامولاتي

الملك : مع السلامة يا أوفي الأصدقاء

مشهد (٧)

(الأميرة وقد تماثلت للشفاء تنتقل بين أركان البستان بالقصر بينما إرتسمت إمارات السعادة على وجه الملك والملكة الأم)

الأميرة: تعرفي يا أمي أنا نفسي في إيه؟

الأم: في إيه يا أميرة القلوب يا قلب محبوب من الكل..

الأميرة: نفسي أعرف ليه الطباخ مسعود كان بيدبر لهلاكى وعلى العكس الفواكه جم يقدموا نفسهم لشفائي بكل القناعة والإقدام والولاء والطيبة والحب...

الملكة: دى كانت مؤامرة كبيرة يا بنتى

الأميرة: مؤامرة!!

الملك: أيوه.. مؤامرة كان مشترك فيها مسعود الطباخ والوزير.. ولولا الهدهد ما كناش إكتشفنا المؤامرة الدنيئة.

الأميرة: وإيه كان هدفهم يا والدى؟

الملك: التخلص منك عشان الوزير يستولى على عرش البلاد من بعدى. لكنه أخذ الجزاء المناسب وطردت المتآمرين شر طردة خارج البلاد.

الملكة: الدنيا يا أميرتى زى مافيه الطيب فيها الرديء ولولا موقف الفواكه ومساعدة الهدهد والساحرة الطيبة ما كنتش رجعت لنا ابتسامتك الحلوة الرقيقة ولا استرديتي صحتك.. الحمد لله.

الملك: وانت يا أميرة باهمالك لصحتك وعدم اهتمامك بشرب اللبن وأكل الفواكه ضعفت صحتك

الفواكه: ما شاء الله يا أميرة وردة فى بستان رقيقة جميلة الحمد لله على سلامة الشفا ورجوعك لينا.

الأميرة: أنا عايزة أشكر كل الفواكه.. والطيور وأروح أزور الساحرة الطيبة وأقدم لها هدية تليق بمقامها عندنا والهدهد الطيب ربنا يجازيه خير على معروفه.

(الفواكه والورود وقد تجمعوا فى شكل دوائر حول الأميرة في حديقة القصر
بين الملك والملكة والوزير والأحباء الأميرة من عامة الشعب وإلى جوار الفواكه
جلست الساحرة تبارك للأميرة والهدهد يغنى أعذب الألحان احتفاءً بشفاء
الأميرة).

هلت ليالى الفرح تانى من جديد
بأحلى ضحكة والكون سعييد
لما هلت شمس النهار الطيبة
فرحت قلوبنا اللى منها قريية
افرح يا كون ده الليلة عييد
شمس النهار يا أم ابتسامة ملالاة
أدى الزهور يوم اللقا متزوقة
كل الطيور اللى كانت متفرقة
اتجمعت وغنت معانا الليلة عييد
نور يا نور الفرح حنة نور
غننى يا بلبل للزهور
وارسم على جبين الأميرة
أجمل هلال فى ليلة عييد
هلت ليالى الفرح تانى من جديد

بسمه أمل

رياض الحلواني

شخصيات المسرحية

- ١- غادة: طفلة مصابة بشلل نصفي عندها من العمر ١٤ عاما تقريبا وهي صاحبة الدور الأساسي للمسرحية
- ٢- شيماء: طفلة طيبة صاحبة غادة، في نفس عمرها وتحب الخير للجميع.
- ٣- فاطمة: طفلة طيبة أيضا وصاحبة غادة وتقوم بدور الوسطة لحل النزاع بين الأصدقاء
- ٤- ياسر : طفل في حوالي ١٤ عاما ومن الأطفال الأشقياء ومن المجموعة أصحاب غادة أيضا
- ٥- عمرو: طفل سنه حوالي ١٢ عاما وصاحب ياسر ومن الاطفال الأشقياء اللذين يعاندون غادة دائما.
- ٦- الحاج أحمد : والد الطفلة شيماء وهو رجل طيب وله دور رئيسي في إسعاد غادة - يعيش وحده مع ابنته شيماء بعد وفاة أمها.
- ٧- أم غادة: سيدة فقيرة تعيش مع غادة وطفلين صغيران في عمر الزهور وهي تبلغ من العمر ٣٥ عاما ويظهر عليها الوقاء رغم ما بها من فقر بعد وفاة زوجها وتعمل بالحضانة.
- ٨- صوت الضمير: رجل مسن له شبيبة بيضاء وعليه وقار ويلبس رداء أبيض وبيده جريدة خضراء.
- ٩- بائع الفيشار : رجل يقف في فاترينة فيشار في الخبية ويبيع للأطفال ببعض الحركات بدون أن يتكلم.

المشهد الأول

المنظر الأول

شرفة على جانب المسرح وأمام الشرفة تظهر حديقة بها بعض الشجر الصغير ومكان دائري على شكل صينية من أجل أن يلف من حوله الأطفال أثناء اللعب وتظهر غادة جالسة في ركن البلكونة ويظهر من خلف غادة باب الشقة الخاصة بها.

وتكون جالسة صامتة تتأمل فيما حولها من أشياء وهي في انتظار الأطفال الذين يأتون كل يوم يلعبون في هذه الحديقة وفي هذه اللحظة ينبعث من بعيد صوت الأطفال وهم يغنون ويمرحون ويقترب الصوت ويظهر علي المسرح مجموعة من الأطفال يتجهون إلي الحديقة وبعضهم يرمي السلام علي غادة فترد السلام وتبتسم لهم وفي هذه اللحظة يتسلل اثنان من الأطفال دون أن يراهم الأطفال الباقون ويتجهون نحو غادة ويفعلون أشياء لمضايقة غادة فتبكي غادة في صمت فيتكونها ويمشوا في هذه اللحظة تأتي شيماء إلي غادة وترمي إليها بزهرة ورد كالمعتاد كل يوم فتمسك الورد غادة بيدها وترفع يدها الأخرى شاكرة شيماء ودون أن يراها الآخرون تمسح باليد الأخرى دموعا امتزجت بالشكر والأسى من أفعال الآخرين وتنظر غادة إلى الأطفال وهم يغنون ويمرحون أمامها في الحديقة وينتهي الأطفال من الغناء ويخرجون من الحديقة وهم يشيرون إلى غادة فيسود المسرح للحظات صمت فتمسح غادة بيدها علي وجهها وتتنهد

المنظر الثاني

نفس ديكور المنظر الأول

غادة : غادة (بصوت حزين) ليه يارب خلقتنى كده وأنا طيبة ومعملتش حاجة وحشة وبحب الناس وبحب أصحابي كل أصحابي رغم أن فيهم أصحاب مش طيبين وبرضه بحبهم ليه يارب ، ليه يارب إن كانت دى حكمتك فاعطنى الصبر يارب(تبكى بكاء شديد بصوت عال)

صوت الضمير : مالك ياغادة ما تخافيش أنا صوت ضميرك الطيب بتكلم معاكى بصوت تسمعيه أنتي لوحدك زى ألامك ما انتى حساها برضه لوحدك بس ليه تشكى وتتوحى ليه تزودى عليه جروحي في حد يبكى وهو فى نعمة كبيرة.

غادة : (مستغربة وترد على الضمير بصوت عال) ازاي اللي أنا فيه يبقى نعمة هو الحرمان من المشى واللعب مع أصحابي وحاجات كثيرة جدا يبقى نعمة؟

صوت الضمير : شوفى ياغادة ربنا زى ما بيقسم الأزواق وبيقسم الأعمار بيقسم الصحة علي الناس والعاهات اللي فى أجساد بعض الناس فى الدنيا بتكون أوسمة علي صدورهم يوم القيامة

غادة : (فى صوت لين) معقول الإصابة تبقى وسام على صدر الانسان يوم القيامة ؟ معقول؟!

صوت الضمير : معقول وفيه دليل كمان ياغادة.

غادة : دليل إزاي وفيه هوه؟

صوت الضمير : هأقولك ازاي هو دليل من «القرآن الكريم» فاكدة جدك ياغادة.

غادة : (تهز رأسها) نعم فاكدة جدى لكن جدي دخله إيه فى الموضوع؟

صوت الضمير : أفكرك كلام جدك اللي كان بيقوله .. كان بيقول ليكى د'يما

«عسى أن تكرهوا شيئاً وهو خير لكم» وكان بيقول كمان فى الحديث القدسى:

«إذا أحببت عبداً ابتليته بالمصائب لكي أظهره بها ...»

غادة : (تتفعل ببعض الحركات) نعم نعم افتكرت افتكرت
صوت الضمير : لسة ما خلصتش كلامى فيه كلام تانى كان بيقوله لكى
غادة : (تنظر إلى الضمير فى وضع استماع)
صوت الضمير : كان بيقولك دايمًا أنت فى نعمة ياغادة أصبرى وربنا هاجازيكى بالخير
يمكن لو كنت سليمة كنت بقيتي بنت شريرة مش طيبة وتدخلى النار.
غادة : كلامك صحيح ليه لآ؟
صوت الضمير : (ينسحب الضمير من على المسرح ويخرج دون أن تراه غادة تلتفت فلا
تجده وفى هذه اللحظة تدخل أمها)
أم غادة : (تأتى مسرعة إلى البلكونة من الباب الخلفى وهي تقول مرددة) مالك ياغادة
بتكلمى نفسك يابنتى وإلا إيه.
غادة : مفيش حاجة ياماما مفيش حاجة ياماما(تنظر إلى مكان الضمير فى استغراب)
أم غادة : (تحاول أن تحمل غادة إلى الداخل) ياللا علشان ميعاد النوم ياغادة.
غادة : معلش سيبينى شوية ياماما حاسة أنى عايزة أجلس كمان شوية ياماما.
أم غادة : يابنتى لتروح على نومة ياغادة وأنساكى وأنت عارفة أنا تعابنة طول النهار
علشان ألم الجمعية اللى هانحجز لك بيها عند الدكتور.
غادة : ما تخافيش ياماما روى نامي انتى وأنا هاقعد شوية ولما يجيبى نوم هاندع عليكى
ياست ماما أنا ليه مين غيرك.
أم غادة : (تستسلم للأمر وترفع الشال من فوق كتفها وتضعه على كتف غادة وتقبلها
وتدخل لتنام) على كيفك يابنتى.
غادة : (لوحتها تنظر فى صمت ناحية الحديقة وتضع يدها على سور البلكونة وتضع
رأسها فوق يدها ويغلب عليها النوم فتنام)

المشهد الثانى

(فى أثناء الحلم تنخفض الإضاءة على المسرح فيتغير المنظر وتختفى البلكونة وغادة تظهر فى ثوب جديد وهي تمشى وترقص وتغنى بعد تغيير الديكور)

غادة : (تحلم أنها تمشى وتغنى وترقص مع الأطفال فى الحديقة ويردون ما تغنيه غادة من الأغاني ويلفون حول الحديقة ويظهر فى ركن بعيد من الحديقة فاترينة صغيرة لبائع الفيشار وتظهر بوضوح بجوار الفاترينة أنبوبة البوتاجاز ويظهر جوار الفاترينة بائع الفيشار فى جزء بعيد من الحديقة)

الأطفال بعد سماع الأغاني : (يجلسون فى ركن من الحديقة ويتجادبون أطراف الحديث)

غادة : (تتسلل من جانب الأطفال دون أن يرونها وتذهب اتجاه بائع الفيشار الذى يكون غير موجود على الفاترينة فى هذه اللحظة)

الأطفال : (فجأة يكتشفون أن غادة ليست معهم فيتفرقون فى البحث عنها ويخرجون خارج المسرح)

غادة : أثناء خروج الأطفال من المسرح تظهر غادة واقفة بجوار فاترينة الفيشار) كويس أن بتاع الفيشار مش موجود وأنا ها أعمل مقلب فى عمرو، ياسر علشان سمعتهم بيكلموا بعض وبيقولوا هانروح ناكل فيشار وعلشان دايمًا حاطين نثرهم منى وبيكرهونى أنا ها أحط صاروخين كبسون وأولعهم من البوتاجاز بتاع الفيشار واستخبي ولما ييجوا ياسر وعمرو أخوفهم وأرميها عليهم ويضحك عليهم كل أصحابى وأبقى أخذت حقى منهم وفشيت على فكرة جميلة فكرة هائلة. أستخبي دلوقتى فى حنة بعيدة علشان زمنهم جاين بيدوروا على (تختفى عن الأنظار)

عمرو وياسر : (فى صوت واحد بعد ظهورهم على المسرح) يا عم احنا دخنا بقى من اللف احنا كان مالنا ومال غادة ومال زفت

شيماء وفاطمة : (تدخلان) ملقتش غادة ياعمرو أنت وياسر

(يشوح بأبده) احنا عارفين بقى راحت فين انتو دورتوا كويس انتو أصحابها
واحنا كمان أصحابها بس انتو دايما تدافعوا عنها .
شيماء : أنا عارفة غادة راحت فين لازم راحت عند بتاع الفيشار
عمرو وياسر :طبعا هي كدة دايما همها علي بطنها
شيماء : حرام عليكم مش غادة فرقت علينا سندوتشاتنا أول ما حضرت أنتوا دايما
بتكرهوها كدة ليه؟
عمرو وياسر : (ينظرون إلى شيماء) مش بنكلمك أنت دايما تدافعى عنها
فاطمة : (تدخل) يا جماعة بدال المنارة تعالوا نروح ناكل فيشار ونشوف غادة هناك
ونرجع بسرعة.
المجموعة : (فى صوت واحد) ياللا بينا(ويمشون وهم يرقصون متجهين إلى بائع الفيشار
في هذه اللحظة تظهر غادة)
غادة : غادة (لنفسها) دلوقتى أولع الصاروخين واسبهم وأجرى علشان عمرو وياسر أهم
جايين(وتختفى)
الأطفال : يقتربون من فاترينة الفيشار وتظهر فجأة نيران الصواريخ وصوت انفجار أنبوية
البوتاجاز وفى هذه اللحظة تنخفض الإضاءة ويسمع على المسرح صوت صراخ
الأطفال وصوت سرينة الإسعاف وصوت تخبيط على المسرح وهرج ومرج وخيال
ناس يجرون لإنقاذ الأطفال .

المنظر الثاني

أثار الحريق وتظهر على المسرح . عادة وحدها في ثياب تظهر عليها آثار الحريق وهي جالسة القرفصاء في ركن بجوار فاترينة الفيشار وتظهر فاترينة الفيشار ملقاة على الأرض بوضوح ويظهر عليها آثار الحريق .

غادة : (تتقدم بخطى بطيئة وبصوت منخفض ملء بالخوف) أنا إيه اللي عملته ده؟ أنا إيه اللي عملته ده(تكرر الجملة بصوت عال وتبكي بشدة وتضع يدها على وجهها أثناء البكاء وتلفت إلى الجمهور وترفع يدها إلى السماء) سامحني يارب وتمشى على المسرح وتضرب كفا بكف. (تقف عادة في وسط المسرح) ياريتني كنت زى ما أنا عملت ايه لما حبيت أزية أصحابي حبايبي وأزيت الراجل الغلبان بتاع الفيشار ذنبه ايه دلوقتي ومراته وعياله ذنبهم في رقبتي وغير كده بقيت وحيدة وانحرمت من الأغاني والورد دلوقتي اللي كان بييجيني كل يوم اللي كانوا بيحبوني الورد دلوقتي في المستشفى محتاجين اللي يجيبهم دلوقتي أنا نفسي أجيب لهم ورد لكن أروح ازاى بعد اللي عملته صحيح محدش شافني لكن هاأروح من ربنا فين (وتبكي بكاء شديدا وتجلس على الأرض وهي صامتة ثم تقف مرة أخرى) ياسلام أتايني كنت في نعمة وأنا مش عارفة ياريت كل واحد كان زى يعتبر منى ويرضى بما قسم الله له علشان ربنا بيמתحن عباده الصابرين ياريتني كنت صابرة (بصوت أعلى مع تكرار الكلمة ثلاث مرات).

(يتردد صوت غادة في المسرح مع تخفيض الإضاءة في المسرح حتى ينزل الستار لحين تغيير المنظر).

المشهد الثالث

نفس ديكور المنظر الأول من المشهد الأول

غادة : يرفع الستار وتظهر غادة وهى في الشرفة واضعة رأسها فوق ايديها وهى نائمة)
ياريتنى كنت صابرة ياريتنى كنت صابرة.

(تظهر أم غادة من باب الشرفة مسرعة نحو غادة)

أم غادة : بسم الله الرحمن الرحيم عليكى يابنتى مالك ياغادة مالك يابنتى

غادة : مافيش ياماما مافيش حاجة روى كملى نومك انتي

أم غادة : أكمل نومى ايه يابنتى ده أنت راحت عليكى نومة وأنا راحت على نومة علشان
اتكلت عليكى أنك هاتصحينى لما أناام شوية.

غادة : معلىش ياماما حصل خير المهم الحمد لله أنى لسه في البلكونه

أم غادة : لازم حلمتى حلم وحش يابنتى ايه حكاية ياريتنى كنت صابرة والكلام اللي بتقوليه
ده قبل كدة لقينك وحدك وبتقولى ليه لاء ودلوقتى بتقولى ياريتنى كنت صابرة لأ
أنا مش هأسكت على كدة ولازم أوديكي للدكتور علشان يشوفك ويطمنى عليكى.

غادة : بلاش ياماما هو كتر فلوس يعنى

أم غادة : يابنتي بلاش عناد وقومى نروح للدكتور هو ايه اللي جري لك وخلاكى تغيرو رأيك
ده أنتي لسه امبارح كنتى هاتطيرى من الفرحة علشان رايحة للدكتور.

غادة : معلىش ياماما نجدى الكنب وأكسى أخواتى علشان الشتاء دخل علينا وأنتي ياماما
هاتى لك فستان خروج علشان فستانك الوحيد ده اتهرى من كتر الغسيل
والمكوى ياماما.

أم غادة : فستان إيه يابنتى وكنب ايه وكسوة ايه ؟ وايه الكلام ده ياغادة؟ أنتي قايمة من
النوم متغيرة كدة ليه ده أنا ما صدقت أنى أخذ أجازة من الحضانة اللي
بأشتغل فيها علشان أوديكي للدكتور.

غادة : وفيها إيه ياماما لما تاخدي يوم أجازة في السنة وتقعدى معانا ونتمتع بيكي أنا وأخواتى ده أنتى بتيجي ياماما مهدودة من الشغل وأنا بأكمل عليكى فى البيت فى خدمتي أنا كمان.

أم غادة : (تمسح دمة) يعنى ده كلامك الأخير يابنتي

غادة : أيوه ياماما علشان خاطرى ما تزعليش منى وأوعدك لما تعملى جمعية تانى هاروح معاكى عند الدكتور.

أم غادة : ما الفلوس موجودة بتاعة الجمعية دى وكنا رحنا للدكتور وخلصنا.

غادة : وبعدين ياماما ده أنا حلفتك بالنبي (ص) والنبي غالى

أم غادة : عليه الصلاة والسلام يابنتى.

غادة : ياللا بقى ياماما خدى فلوس الجمعية وأعملى اللى قلت لك عليه لأخواتى ونجدى الكنب عشان منظره بقى يكسف ياماما.

أم غادة : خلاص يابنتي اللي تشوفيه مدام ده هايرحك

غادة : متشكرة جدا منك ياماما يا أحلى أم فى الدنيا

أم غادة : (تحاول أن تضع يد غادة على كتفها لتحملها إلى داخل المنزل وتطفىء الإضاءة

أو تخفض لحن تغيير المنظر ، بعد خروج غادة مع أمها يتغير المنظر ويظهر

على المسرح ديكور جديد يلازم منزل الحاج أحمد أبو شيماء وهو رجل ميسور

الحال) .

المشهد الرابع المنظر الأول

الحاج أحمد : (يظهر على المسرح وهو ينادى على ابنته شيما ويلتفت يمينا وشمالا ثم يجلس على كرسي في ركن المكان وينظر في اتجاه الترابيزة الصغيرة يوجد عليها كتب شيما وبعض الأشياء الأخرى الخاصة بها ويقوم من علي الكرسي نحو الباب ويكرر النداء على شيما ثم يتجه نحو الترابيزة الصغيرة ويقلب في كتب شيما وفجأة يجد علي الترابيزة جواب فيمسك الخطاب مستغربا يمشى ذهابا وإيابا وهو يقرأ في الخطاب وما زالت عليه علامات الدهشة ثم يجلس علي الكرسي مرة ثانية ثم يقوم مسرعا نحو الباب وينادي) شيما شيما

شيما : (تدخل شيما مسرعة) نعم يا بابا.. نعم يا بابا.. أنا أسفة يا بابا خرجت من غير ما اقولك أصل كنت بكلم صاحبتني فاطمة عشان رايعين مشوار قبل المدرسة.

الحاج أحمد : برضه مش كان واجب تأخدي رأي بابا والا خلاص بابا اتنسى
شيما : (تنتظر إلى يد والدها فتري الخطاب في يده فتعرف أن أباها عرف الموضوع تقترب منه) معقول يا بابا أنساك؟ حد ينسى روحه، ينسى أطيب أب في الدنيا كلها؟

الحاج أحمد : يعني كنت هاتقولي يا شيما
شيما : نعم يا بابا وأنا حظيت الجواب على الترابيزة عشان تشوفه قبل ما أبعثه زى ما عودتني يا بابا مش إحنا أصحاب وما بنخبش حاجة على بعض؟
الحاج أحمد : (يضحك بصوت مرتفع وهو مبسوط ويقول) على العموم يا شيما ده عمل عظيم وخير بس مين غادة اللي عايزة تبعتيلها جواب في ليلة القدر لعللي أمين.

شيما : بنت طيبة خالص يا بابا ومشلولة ياعيني
الحاج أحمد : ودي زميلتك في المدرسة وإلا إيه يا شيما؟
شيما : ياريت يا بابا ده رغم إنها مشلولة لكن بتذاكر وتحاول تعلم نفسها بنفسها

الحاج أحمد : وعرفتنيها إزاي وهى مش بتمشى ولا بتلعب معاكم ولا حاجة.. اللهم لا اعترض علي حكمك اللهم اللطف بعبادك.

شيماء : الحكاية ببساطة يابابا إن غادة بيتهم جنب الحديقة اللي بتلعب فيها كل يوم بعد المدرسة واحنا بتلعب يابابا بنعطش فغادة بتخللى مامتها تجيب لنا ميه وتجيلنا وساعات بتجيب لنا حصيرة عشان نقعد عليها نرتاح وحاجة تانية يابابا بلاش منها بقى.

الحاج أحمد : إيه هى يا شيماء الحاجة اللي تكسف دى يابنتى؟
شيماء : بصراحة يابابا لما بنتزق أوى أنا وأصحابى بنستأذن مامتها ويندخل التواليت
الحاج أحمد : (يضحك من قلبه) ياه إيه ده.. ده أنتم علي كدة واخدين علي غادة ومامتها قوى

شيماء : طبعاً يابابا تصدق يابابا رغم حالتهم اللي على أدها ساعات مامتها تمسك فينا وتذينا سندوتشات

الحاج أحمد : يقول شوقى يا شيماء يابنتى الكرم مالوش دعوة بالغنى والفقر والكرم طبيعة في الناس ولاد الأصول ودول ناس ولاد أصول ودار عليهم الزمن يا شيماء.
شيماء : نعم يابابا دى إنسانة غريبة تصور يابابا رغم الظروف اللي هي فيها بتذاكر ويتعلم نفسها والترفيه الوحيد في حياتها أنها تتفرج علينا كل يوم واحنا بتلعب ويتبقى قاعدة في البلكونة تنتظرنا بفارغ الصبر.

الحاج أحمد : ليه يابنتى ما عندهومش تليفزيون ولا إيه؟
شيماء : ترد بتأثر وحزن منين يابابا أبوها ميت وأمها بتشتغل فى الحضانة عشان تربى أولادها اللي غير غادة

الحاج أحمد : هى غادة لها أخوات تانى يا شيماء؟
شيماء : نعم يابابا فيه ولدين صغيرين ويظهر مالهومش حد خالص
الحاج أحمد : يابنتى ما فيش ناس مالهاش أهل بس جشع الدنيا مخلى الناس بعاد عن بعض فاكرين الدنيا دايمه وناسيين صلة الرحم اللي وصى بها ربنا في جميع الأديان .

شيماء : تستعطف أبوها ياريت يابابا تيجى معايا نزورهم ده غادة هاتفرح جدا جدا

وبالذات لما أقول لها علي الجواب بتاع ليلة القدر.

الحاج أحمد : (يأخذ خطوات سريعة على المسرح ذهابا وإيابا ويلتفت إلى شيما ويقل لها) أنا فعلا هاأروح أزورهم بعد اللي سمعته منك عنهم يا شيما.

شيما : (تجري نحو أبوها بابتسامة عريضة وتقول) صحيح يا بابا

الحاج أحمد : صحيح يا شيما وهاأعمل مفاجأة لغادة هاتعجبك جدا جدا

شيما : هي إيه يا بابا؟

الحاج أحمد : خليها مفاجأة لغادة ولك.

شيما : (تمشي بدلال نحو أبوها وتقول) والنبى يا بابا قولى عليها الله يخليك.

الحاج أحمد : يجلس على الكرسي حلفتني بالنبي عليه الصلاة والسلام حا أقول لك وأمرى إلى الله بس روى المدرسة علشان متتأخريش دلوقتي وقولى لزمالك إننا أجلنا موضوع الجواب لبعدين. (مقاطعة كلام أبوها) ليه يا بابا ده غادة تزعل قوي دى حطه أمل كبير على ليلة القدر علشان يجيب لها كرسي بعجل علشان تنزل وتلعب معنا في الحديقة.

أحمد : (يبتسم) ماهى دية المفاجأة يا شيما يابنتى

شيما : برضه مش فاهمة حاجة يا بابا عن المفاجأة

الحاج أحمد : بعد ما تيجى من المدرسة هاتى معاكى أصحابك وأصحاب غادة وتعالى علي البيت على طول هاتلاقى المفاجأة بتاعة غادة هنا فى البيت عندنا.

شيما : عرفتاه عرفتاه يا بابا (تقبل أبوها بطريقة هستيرية)

الحاج أحمد : طب هي ايه يا شيما لما أشوف عرفتاه ولا لأ.

شيما : يا بابا ده أنا تربيت الحاج أحمد إزاي ما أعرفش المفاجأة هاتجيب كرسي العربية لغادة كدة ولا لأ؟

الحاج أحمد : برافو عليكى يا شيما حرقتي لى المفاجأة

شيما : ربنا يخليك ليه يا بابا ويقدرك علي فعل الخير.

الحاج أحمد : ياللا يا شيما بقى على المدرسة وما تنسيش تجيبى أصحابك وأصحاب غادة فى البيت هنا .

شيما : حاضر حاضر يا أطيح أب فى الدنيا وتخرج شيما ذاهبة إلى المدرسة

الحاج أحمد : (يمشى على المسرح ذهاباً وإياباً ثم يقف في نصف المسرح ويقول) يا سلام
حكمتك يا رب ويرفع يده إلى السماء لك فى ذلك حكم ويوجه إلى الجمهور ده أنا
لسة امابرح بالليل كنت محتار في زكاة المال. أوزعها السنة دى ازاي لأن السنة
دي والحمد لله المشروع نجح والرزق زاد عن كل سنة. سبحانك يا رب ترزق من
تشاء بغير حساب علشان كدة أنا نويت إن شاء الله أجيّب لغادة الكرسي
وكمان تليفزيون علشان يسليهم. كدة أنا نويت إن شاء الله أجيّب لغادة الكرسي
وكمان تليفزيون علشان يسليهم.
(يشاور إلى الجمهور) ما تفتكروش اللي بيعمل خير بيدى حاجة من عنده ده
المال مال الله واحنا جميعا عبيده وفى الحديث أن هناك ملك يقول كل صباح.
«اللهم اعط منفقاً خلفاً اللهم اعط ممسكاً تلفاً»
(يكرر هذه الجملة ثلاث مرات ثم يخرج مسرعاً وينزل الستار استراحة قصيرة
لحين تغيير الديكور)

المنظر الثاني

(يرتفع الستار عن منزل الحاج أحمد أبو شيماء بنفس الديكور مع تغيير بسيط وهو إضافة عدد من الكراسي وبعض الزينة استعدادا لإستقبال التلاميذ أصحاب شيماء وغادة في المنزل وباب المنزل مفتوح دائما يظهر على المسرح فاطمة وهي تنادى على شيماء من داخل المنزل وتقول أنت فين يا شيماء أنت فين يا شيماء)

(تظهر في جانب من المنزل مع بعض الأصحاب وهم يشاورون بأيديهم بحركات تدل على الحوار دون صوت) أنا جياك يا فاطمة حالا (يدخل ياسر وينظر في جميع أركان المنزل يبحث عن غادة لأنه يجهل أنها مصابة بالشلل).

ليرى شماء مع المجموعة فيحييها فتحبيه ويجلس على الكرسي ويدخل يدور في المكان باحثا عن غادة ثم يسلم على ياسر والمجموعة ويأخذ شيماء على جنب.

شيماء : فيه إيه ياعمر شايفاك من ساعة ما دخلت وأنت بتلف حوالين نفسك زى ما تكون داخل البيت ده لأول مرة ولسة بتتعرف علي محتوياته

عمرو : بصراحة كدة يعنى أنا بدور علي البنت غادة أنت ما عزمتهاش زينا وإللا إيه .

شيماء : أنا مش عارفة ليه واخد موقف من غادة مع أنها دايم تسأل عليك لما تغيب.

عمرو : (ينكسف وينظر في الأرض) أصل غادة بصراحة متكبرة قوى ما فكرتش ولا مرة تلعب معنا في الحديقة بس بتبص علينا وهي قاعدة في البلكونة وعاملة نفسها أميرة زى بتوع ألف ليلة وليلة واحنا العبيد اللي بتزفها ونرقص قدامها.

شيماء : (تنظر إلى عمرو وهي مستغربة) ياعمر الكلام اللي بتقوله ده غلط في غلط غادة غير كدة خالص.

عمرو : الحق يا ياسر (فيأتى ياسر مسرعا) شيماء بتقول علي غادة طيبة يظهر إنها ما تعرفش حاجة خالص ، غادة طيبة مش معقول لما هي كدة مش بتنزل تلعب معنا ليه.

شيماء : ما تقدرش تلعب معاكم ما تقدرش ياعمر.

عمرو : عرفت كلامى صحيح اهو أنت بنفسك بتقولى الى أنا عايز أقوله(شيماء)وتنظر إليه مستنكرة عدم فهمه الموقف وفي هذه الأثناء تدخل فاطمة)

فاطمة : (تحاول تلطيف الجو) فيه ايه يا جماعة صوتكم عالي خالص ومالكم مكشرين كدة ليه زى ما تكونوا واكلين كشرى . زى اللى قدام المدرسة وبتاع الكشرى مكثر له الشطة علشان ما يبانش أنه حامض ويبتسم

شيماء : تتصورى يافاطمة ياسر وعمرو ما يعرفوش ظروف غادة لحد دلوقتى

فاطمة : فاطمة باستغراب معقول اللى بتقوليه ده يا شيماء.

شيماء : (تمشى خطوتين وترجع إلى مكانها ثانى وتوجه الكلام إلى فاطمة) فهميهم أنت يافاطمة والتبى وأنا هاأكلم بابا فى التليفون هأشوفه غاب ليه.

فاطمة : (تأخذ ياسر وعمرو ويجلسون هم الثلاثة على الكرسي وتقول) عارف يا عمرو أنت وياسر لو تعرفوا حقيقة غادة هاتزعلوا جدا وتندموا على كل كلمة جرحتها بها قبل كدة.

عمرو وياسر : نندم إزاي يافاطمة هو فيه حاجة إحنا ما نعرفهاش

(فى صوت واحد)

فاطمة : طبعا فيه حاجات كثيرة أنتم ما تعرفوهاش علشان ما فيش مرة سألتوا فيها نفسكم ليه غادة ما بتنزلش تلعب معاكم.

عمرو وياسر : صحيح إحنا ما سألناش نفسنا قبل كدة لأننا ما كناش واخدين الموضوع باهتمام، ياسر وأنا كمان ما كنتش مهتم قوى إلا بحاجة واحدة إزاي افكر فى فكرة جديدة أغيظ بها غادة لكن ليه يافاطمة ما كنتش بتنزل تلعب معانا.

فاطمة : علشان غادة مشلولة عرفتوا ليه(وتتأثر فاطمة من الكلام وتجلس على الكرسي)

عمرو وياسر : (فى صوت واحد ويحزن شديد) غادة مشلولة مشلولة معقول سامحنا يارب سامحنا يارب (يدوران حول نفسيهما فى مكان قريب من الجمهور) سامحنا يارب فى صوت واحد.

فاطمة : (تقوم من على الكرسي وتحاول أن تواسيهم) معلش يا عمرو معلش يا ياسر أنتم برضه ما كنتوش تعرفوا وأكد ربنا هياسامحكم على اللى فات.

عمرو : لو ربنا سامحنا هاتسامحنا غادة

ياسر : وأنا أسامح نفسي ازاي لو غادة سامحتنى وأوريها وشى إزاي بعد اللي عملته قبل كده؟

فاطمة : (مقاطعة) على العموم دموعكم اللي نازلة دى أكبر دليل على التوبة واللى فات نتعلم منه وما نتسرعش ونظلم حد تانى من غير ما نتأكد.

عمرو : أوعدك يا فاطمة إنى هأفكر ألف مرة قبل ما أعمل أى عمل أيا كان نوعه.

ياسر : وأنا كمان أعاهد الله وأعاهدك يا فاطمة إنى لن أتسرع فى أى قرار قبل ما أتأكد منه ألف مرة (تنظر إليهم فاطمة وهم صامتون يتبادلون النظرات)

فاطمة : طيب إيه رأيكم فى المفاجأة اللي عملها الحاج أحمد أبو شيما؟

عمرو وياسر : صحيح يا فاطمة إيه هى ياترى،

فاطمة : أنتم عارفين احنا مجتمعين هنا ليه؟

ياسر : يمكن عيد ميلاد شيما واللا حاجة علشان أنا شايف تغيير كبير فى المنزل

فاطمة : طب قول أنت يا عمرو إيه هى المفاجأة؟

عمرو : أنا بأقول عم أحمد عزمنا على فسحة ولا حاجة زى اللي كان بيعملها زمان

فاطمة : ها أقول لكم إحنا هنا فى انتظار الحاج أحمد علشان هايحبب عربية لغادة هدية علشان تمشى بيها وتلعب معنا فى الحديقة.

الحاج أحمد : (يدخل أثناء هذا الحوار دون أن يراه أحد ويستمع إلى باقى الكلام بكل تأثر ويحاول أن يمسخ دموعه بيده)

ياسر وعمرو : الحمد لله الله يخليك يا عم أحمد ده أحسن خبر سمعناه.

فاطمة : فيه حاجة حلوة تانى

شيما : (تدخل شيما فى الحديث وترد على عمرو) إنت وياسر هاتيحي معنا علشان

نروح كلنا نودى العربية لغادة فى بيتها ونهنئها بالهدية الجميلة ونركبها عليها

وتلعب معنا فى الحديقة .

المجموعة : (المجموعة كلها تلتف حول شيما بعد سماع هذا الكلام وتهتف فى صوت

واحد) يعيش الحاج أحمد (تخرج شيما أثناء الهمس دون أن ترى والدها أو

يراهها هو يدخل الحاج أحمد أثناء الهمس وهو يمسخ دموعه بيديه لهذا الحب

الذى رآه فى عيون الأطفال) يا أولاد هو أنا دخلت الانتخابات بوأنا مش عارف

واللا إله،

ياسر : والنبي يا حاج لو دخلت الانتخابات هاتنجح وأنا أول واحد ينتخبك وأخلي أبويا
كمان ينتخبك.

الحاج أحمد : (يضحك بشدة ويضرب كفا بكف يتلفت فى أركان المنزل) فين شيماء؟

شيماء : بابا حمد الله على السلامة آيه اللي أخرك؟

الحاج أحمد : (ياخذ ابنته شيماء بعيدا عن الأطفال ويقول لشيماء) عايزة تعرفى سبب

التأخير كنت بأجيب بعض الملابس لفادة وأمها وأخواتها مش أحسن كدة

يا بنتى.

شيماء : طول عمرك صاحب واجب يا بابا (ينضم الحاج أحمد وشيماء إلى المجموعة) ياللا

يا أولاد يا شطار انزلوا تحت.. العربية فى انتظاركم وفيها الهدايا بتاعة غادة

علشان نروح نوديتها لها (يخرجوا جميعا).

المشهد الأخير

(يفتح الستار على منظر لمنزل أم غادة من الداخل وهو منزل متواضع لأسرة فقيرة متوسطة الحال).

أم غادة : تظهر أم غادة وهى جالسة فى وسط الحجرة على كرسي عال وتمسك في يدها جلابية قديمة لتخيط جزء منها مقطوع ويظهر فى أركان الحجرة كنبه ودولاب ملابس قديم وفى ركن آخر يظهر سرير غادة وهى نائمة عليه فى اتجاه المسرح ويوجد على الأرض حصيرة مفروشة وعلى الحائط بروزان لصورة المرحوم والد (غادة)

غادة : تقوم من النوم وتقول صباح الخير ياماما هى الساعة كام دلوقتى لتكون راحت عليه نومة؟

أم غادة : راحت عليكى نومة ازاى مش أنت لغيتى موضوع الدكتور ياغادة

غادة : مش موضوع الدكتور ياماما

أم غادة : هو فيه موضوع ثانى أهم منه؟

غادة : أيوة ياماما أصحابى لما بيخرجوا من المدرسة يلعبوا فى الحديقة زى كل يوم ياماما أنتى نسييتى وإلا إيه ده أنتى مسقعة القلل ليهم بالليل علشانهم؟

أم غادة : عندك حق يابنتى فكرتيني لما أقوم أحضر ليكى القاعدة بتاعتك فى البلكونة وتخرج أم غادة من الباب لتحضر قاعدة غادة وتظهر غادة على المسرح لوحدها على السرير تحاول أن تعدل نفسها وتكون فى مواجهة الجمهور وترفع يدها إلى السماء) يارب لك الحمد على كل شىء أنت عارف أنا عايزة إيه طلبى بسيط جدا يارب وهو أن يقبلوا جوابى فى باب ليلة القدر علشان أقدر أساعد ماما فى البيت وأقدر أتحرك من خلاله يارب أجبر خاطرى والنبي يارب(تمسح بيدها على وجهها بعد انتهاء الدعاء وتجلس صامتة فى مواجهة الجمهور لمدة دقيقة ثم يذق الباب من الخارج يسمع من داخل المسرح)

غادة : ياماما ياماما شوفى مين بيخبط على الباب(صوت أم غادة يأتى من جانب
البلكونة) أنا جية أهوه (وتتجه أم غادة نحو الباب لفتحه فيدخل الحاج أحمد
أولا فتنظر له أم غادة باستغراب)

الحاج أحمد : السلام عليكم يا ست أم غادة

أم غادة :وعليكم السلام يا بيه.. حضرتك مين؟.. صاحب المرحوم، والا الدكتور.. يادى
الكسوف.. أصل احنا يا أخويا لغينا الكشف بتاع غادة لظروف تانيه.. يادى
الكسوف..

الحاج أحمد : يا ست أم غادة دكتور إيه وكشف إيه.. انتى فاهمه غلط.. أنا أبو شيماء
صاحبة غادة بنتك.. بس أنا مش لوحدى..

أم غادة : الجماعة معاك والنبي ألف مرحبة ده إحنا زارنا النبي يامرحب يامرحب خليفهم
يدخلوا

الحاج أحمد : يضحك يا ست لا جماعة ولا حاجة دول صحاب غادة واقفين برة يستأذنوا
وجايين يقدموا هدية لغادة ويحتفلوا معاها هنا عندكوا فى بيتكم. فيه مانع
يا ست أم غادة.

أم غادة : يامرحب يامرحب يانهار أبيض اتفضلوا اتفضلوا انده لهم ياحاج وتذهب أم
غادة وتنادى على غادة ياغادة ياغادة فيه ضيوف.

الحاج أحمد : (ينادى على الأطفال فيدخل عمرو وياسر وفاطمة وشيماء ويحمل ياسر
وعمر كل واحد بوكيه ورد. وشيماء تجر العربة وعليها بعض الهدايا وهو حامل
بين يديه التليفزيون ويتجهون جميعا نحو غادة يسلمون عليها ويقبلونها وهى فى
استغراب من هول المفاجأة، والحاج أحمد يقف فى ركن المسرح يراقب فرح
غادة بالهدية والأطفال يقدمون لها الورود)

ياسر وعمرو والدموع فى عينهم ندما على ما كانوا يفعلونه فى غادة وتأثرا
بمنظرها حين رؤوها فى هذا المنظر الأليم ويمسح الحاج أحمد دموعه بمنديل
وهو يرى أم غادة وهى تقترب من غادة وتحضنها وتبكي بصوت عالى تأثر منه
الأطفال الواقفون وهى تقول ياما أنت كريم يارب وتكررها ثلاث مرات وتتوجه
إلى الجمهور وتصافح الحاج أحمد وتحاول أن تقبل يده لما قام به من جميل نحو

أولادها.

الحاج أحمد : (يسحب يده بسرعة متأثراً ويقول لأم غادة) استغفر الله العظيم مع تكرارها مرتين ويقول أنا ما عملتش حاجة ده كله بتاع ربنا وكله فانى ويتوجه الحاج أحمد إلى الأطفال ويقول ورونا بقي هاتغنوا ازاي لغادة عاوز اشوفها وهي بتلعب معاكم لأول مرة.

(يلتف الأطفال ويمسكون الكرسي المتحرك ويحملون غادة ويضعوها على الكرسي ويغنون أغنية لغادة وتمسك شيماء بظهر الكرسي والباقيون يمسكون في بعض على هيئة قطار ويلفون علي المسرح ويبعدون في ركن المسرح وهم يلفون وينخفض صوت الأطفال وتتقدم أم غادة)

أم غادة : نتقدم من الجمهور وترجع وتمسك يد الحاج أحمد وتقدمه إلى الجمهور) . ياريت كل إنسان قادر على الخير يقدم بسمه أمل لكل محتاج ولكل إنسان زى الحاج أحمد ما عمل ياريت (يردد الأطفال في صوت واحد) ياريت كل إنسان قادر على الخير يقدم بسمه أمل بسمه أمل وينزل الستار رويدا رويدا .

(ستار)